

奉新縣志卷三

建置志一

城垣

官署

防汛

秩祀

公儀

祠廟

寺觀

夫辨厥方位禮崇經國之謨相其陰陽詩美乃疆之績規模畧定制作長垂建置之猷備哉粲已奉新析海昏為邑中經遷徙舊構多湮好古之儒所為掩卷太息也

聖朝典章大備經典咸宜

皇上宵旰勤民孜孜無已凡城垣官廨防汛津梁水利之屬其有廢壞須修營者大吏以聞無不報可至於釐正祀典禮文艷然廟廷真焉觀宇穆若炳炳乎丕天之律矣昔吳越春秋越絕書皆記城墉三輔黃圖洛陽伽藍記並詳宮觀

漢書溝洫志備載河渠今蒞自立縣之初首紀城垣次述  
官廨防汛秩祀祠廟寺觀及津梁水利之可紀者畧具斯  
篇爲建置篇云

### 城垣

縣治漢靈帝中平時立於新興鄉磐山之北唐神龍二年  
縣丞高良弼徙於馮川之北舊無城長慶三年縣令劉正  
一築土城周五里建南北二門歲久圯明成化二十二年  
知縣鄧誠命隣近富民蓋造五門徐南暘造東門在迎恩  
坊今之老東門是也梁公賢造西門在西北天津橋徐君  
彥造南門在學舍右周雲龍造北門在龍山左僧覺智造

建昌門在寶雲寺右正德五年華林寇起七年副使吳一  
貫督師至同知縣鄒緄重築南盡河岸皆以磚壘北抵山  
麓東西廣益倍之皆以土築覆以椽瓦立四門置廂樓周  
迴鑿池以限衝突嘉靖元年水漲城傾知縣朱雲鳳修復  
後五十餘年城復傾圯隆慶五年知縣陳雋詳請修築道  
院委員勘量原城周迴八百八十二丈五尺動道府縣紙  
贖銀二百九十九兩七錢八分隨集在城義民徐六七廖  
八十陳坎三甘信六等領銀分築至萬曆元年九月工竣  
謝廷傑儒學水城記奉新隸南昌郡在省治西距百餘里  
曩時城厚且完數十年漸就頽毀往邑侯至皆以當國家  
承平時可恃無警莫任修葺逮長樂陳侯來治茲邑則喟  
然太息曰噫殆哉易曰王公設險以守其國故周禮有掌

固之職凡以掌修城郭溝池樹葉之固也今堂堂一大縣不知為城守計吾弗知所終已遂議出羨餘經理之於是縉紳之士嘖嘖言其弗便於學先是學宮之前時以高城中外隔絕凡山川之奇皆為其所蔽是時以科第起家樹聲廟堂者雖不乏人然僅僅焉不多見耳城頽之後遂相繼接踵而出若山川之靈使然侯乃量工命日分財用平板幹未浹數旬悉繕完之於學宮之前則拓其舊跡延袤以迄於川據水為阻甃以石自外視則壁立數仞鬼然一城自內視則川原形勝一覽都盡無復曩時之隔絕也於是士皆樂之矣其願涵泳於詩書之門遊觀乎道德之域者不知幾千百人也嗚呼可謂知大計哉亦可謂善道哉吾聞侯之宰是邑也利者與弊者革偃者起困者甦民曰便矣而是舉也士又便之乃爭自淬礪以為百姓倡將見為屏翰為干城而孝弟忠信之俗成小民親其上死其長茲邑行且為保障矣侯之澤其有窮哉昔人謂大儒善調一天下必得百里之地而後見其功今侯當一而之寄所建立乃如是則他日秉鈞持衡即調一天下無難矣中丞徐公嘗稱侯弭盜可方龔遂造報可方文翁以今觀之信然時博士弟子具述其由以禮與幣來請予記其事且以堯大父文莊公嘗記其修學而是舉也亦將勒石於學

以志侯績 萬曆九年知縣朱南英詳請加甃嶺北道憲副於不朽云

前奉新令金應徵議以南豐羨銀九千餘兩轉給本縣兵備僉事石漢贊成之遂築磚城東門計一百七十堞南門計三百堞西門計五百堞北門計二百一十七堞共一千一百八十七堞八閱月工竣顏其門東曰賓陽西曰齊霞南曰迎薰北曰拱辰南門左右開水門迤東南復開馮田門邑冢宰蔡國珍記萬曆二十二年知縣馮燧移西南水門於學宮之前拓水城地以環之額曰遊聖門今東南西北暨右水門如故馮田門塞於萬曆三十年左水門塞於萬曆四十七年俱廢崇禎十三年四郊多警知縣李允佐

請增高城堞巡撫解學龍題允將本邑當年里長經催免其充役里長一名納銀十二兩經催一名納銀八兩陶磚增壘稱雄壁焉

國朝康熙二年城復圯知縣黃虞再詳請修砌總督張朝璘捐銀五百兩米二百石巡撫董衛國捐銀四百兩米二百石本府知府葉舟捐銀五百兩黃自捐銀六百二十兩米三百石邑紳民捐助有差凡七閱月始竣

黃虞再老東門記今東門外二百步許有廢基巍然猶存詢之蓋舊東門也因富陽水沿北城東流又沿東門城南流淺爲城害故稍內徙以避之門屬於垣舊者隨以在外而廢焉予觀水脈由此會歸馮川環繞有益風氣但城旣內徙而水則殺而漫直而疾不復蜿蜒之態何有之元之奇或非作者初心矣予就而葺其基豎文昌閣於上以迎異氣且用關鎖水脈云復堤焉

護而收之似覺曲折有勢非復殺而漫直而疾矣不惟此也臺閣外時屹然屏障設伏守險以備捍禦守土者意固如是乎若徒狃地理之說而故爲不經之役又非予之所敢出也

嗣後遇有坍塌十二鄉里民分任修砌三十八年邑人洪奉銘等呈控列憲批飭

城垣倒壞印官捐修豎立碑石雍正四年知縣王藩捐修

三十餘丈六年知縣童希睿捐修四十餘丈十年城傾十

丈東門城臺城樓俱圯知縣趙知希詳請捐修自十二年

十三年及乾隆元年每年繕修計費養廉銀三百四十四

兩零而東南壯觀矣其外城高一丈六尺內城高一丈東

門至北門長一百二十九丈北門至西門長二百六十二

丈五尺西門至水門長一百丈五尺水門至南門長一百

三十丈南門至東門長二百六十丈五尺共計八百八十二丈五尺乾隆二十七年職貢嚴遇洪呈請獨力捐修用銀二千一百六十五兩零奉

旨議敘以州同本職雙月選用嘉慶二十五年知縣鄒山立倡修

各城門樓又捐廉重修游聖門青雲樓自爲記邑人趙敬襄宋鳴琦

皆有文紀其事不備錄道光二年各鄉捐修南城垣八十餘丈東門

城樓廖崇道裔捐貲重修西門城樓徐樹榕捐貲重修南

門城樓鄧仁孫裔捐貲重修北門城樓甘養拙裔趙壽卿

裔捐貲重修鄒山立重修青雲樓記奉新名縣也人物之盛山川之秀甲於他邑者不勝書好義之事

亦難更僕數卽城垣樓堞稽之舊志出於邑前哲之營繕者往往不乏其人奈歲久多傾圮慮無以固防禦肅觀瞻

也爰不避勞瘁逐一勸捐幸大夫君子皆有同心重修城樓南則有鄧氏衆姓東則廖祠北則甘趙二族西則徐生樹垣共起而肩任之不期歲四樓巍然以新此外城垣則闔邑輸金可以集事惟學門青雲樓廢壞已甚先是乾隆四年間有邑人彭君仕捐修今其後裔弗克繼志有志者又未便過問予曰是有司之責也庸可緩乎於是捐廉重修擇日興工又因簿書缺掌爲倩邑紳士鄧翹齡鄧兆椿鄧敬修代爲經營肇始於嘉慶二十五年十月告成於道光元年三月事半功倍頗稱盡善頷以青雲干呂卽其舊而稍易之也登斯樓也內拱

聖人之居外攬雙橋之勝則有心曠神怡低徊而不忍去焉者至於今昔原委暨樂助工費另有碑刻茲不具載

城濠今古蹟尚存濠外臨馮水乾隆辛卯年知縣尹德嘉倡修城中舊有礮臺八座乾隆年間拆廢

府志按省志載萬厯間知縣胡東陽李呈芳周道昌崇禎時知縣據伯崑均有修城事舊志同考胡東陽諸人俱係武寧知縣有秩官表可據蓋省志誤入奉新舊志後沿省志之誤耳

官署

縣署始於唐神龍二年新吳丞高良弼建於馮水之北

宋嘉祐八年縣令丁餽修飾顏堂曰希宓餽自爲記政和

中縣令上官允若創譙樓嘉定間縣令張國均重建趙彥

章記并建華豐樓於治右奉議郎桂如箴記

丁餽希宓堂記奉新令廳

之北有堂三楹兩輔扶翼四牖周列前架飛梁後穴盆池  
間以花草植於其間以爲公餘休息之所向之宰是邑者  
遺而不名予之來也榜曰希宓意謂子賤之爲單父而人  
不忍欺是可希也或詰之曰古之爲邑政澤及於民而過  
於宓者多矣何獨此云哉曰宓有不忍人之心行不忍人  
之政故下不忍有所欺於上非強明峻責所能致用至誠  
以臨人人感至誠而化之以自致者也孟子曰行不忍人  
之政治天下可運之掌上况單父也哉使宓得而進用其  
所致未易知也嗚呼宓之爲治亦至矣道著乎已充乎民  
仲尼稱之爲君子用是自勉庶幾有所存爾豈敢以貽來

者乎然有與我同志者升是堂思以誠而臨諸民必不廢  
 斯言 趙彥章譙樓記重門擊柝軍自古初外建皇門實  
 重侯國夫門之制尚矣奉新縣門 甲縣令上官允若始叙  
 末禾之有改也按續題名記政和 甲傳於士人進取不利  
 樓又三十年巷陌易嚮寢失舊規 甲僅三四而鄉大夫賢  
 自此更五六十載間進士登科題 甲簿趙希義主學邑人  
 能之書或比歲一獻開禧丁卯會 甲屋視嚮一新之衆志  
 士相率以告乃為請葉令君苟撤 甲令君堯仁踵其成終  
 翁然費不約而集工未輟葉代去 甲孫國均字維之始  
 弗克備庚午秋尚書簡肅南城張 甲崇教事雖廩餼膳爨  
 至即病之頽力未遑也乃先修學 甲乃率僚佐進諸生少  
 之末無不備飭明年俗益康政益 甲不興起又明年君報  
 長於學舉鄉飲酒禮遠近來觀者 甲留者數百人一日  
 最將及瓜邑內長幼狀其治行詣 甲築今索然層屋而  
 論於衆曰縣樓更造既再竟成道 甲以聳民之視聽壯  
 已耳如人形體畧具而精神弗隨 甲成之翼張翬飛洞開雙  
 吾邑之形勢哉乃命日量工而落 甲燁燁人誠百里之雄  
 屏振陳拔卑為高為新煒然丹青 甲燁燁人誠百里之雄  
 觀焉於是披解者四人半在郭郭 甲燁燁人誠百里之雄  
 嗚呼豈君垂意作成天固相之誠 甲燁燁人誠百里之雄

陰陽之運土木之功應於福澤之數者歟時創樓之士  
 以記請君曰此非某之功前人之功也然某得承乏茲邑  
 值時和歲豐上官仁賢寬其程督得與諸君相從事否則  
 肘一擊書雖欲善得乎此又非前人之功上人之功也士  
 若民喜曰此令君所以為功也使來俾彥章記嘗聞之全  
 義縣不利塞北門百有餘年盧遵為令復之而邑人便焉  
 河東柳子厚記其事以為賢莫大於成功若是而不列殆  
 非孔子徒也嗚呼君之功有遜於全義者乎自是推之由  
 小以驗其大其惠利斯世庸有既乎若述令辭以聲美績  
 當有大筆若子厚者書之非彥章所敢云也 桂如篋華  
 豐樓記天地至和之氣槩於人心之微散於萬物之表雖  
 無形以名有形以應故以和召和則噓為祥風蒸為甘雨  
 孕為華黍薰為豐年斯人之情有莫知其所以然而然者  
 此華豐樓所由作也新吳跨馮水以畫疆而治於其北氣  
 象平衍而勢宏博北趨江淮南湊荆越道路四達商賈會  
 通井邑繁盛民生殷阜號為江西望縣然官有權酷而市  
 無酒樓不足以導斯民權忻怡愉之情邦人數有請莫克  
 建立盱江張令尹以嘉定庚午八月來宰是邑本之以慈  
 祥樂易而行之以勤果練密蘇醒潰堯濯垢剔蠹百里之  
 民日相安於無事一年大熟二年又熟三年如始至之年

租賦不督自辦耕夫饁婦扶老攜幼間行於桑疇麥隴之外邑之士大夫耆老合詞請曰人之情久鬱而忽暢則舒久抑而忽快則喜吾邦厄於旱蝗幾年於茲自公之來歲乃屢豐盍思有以遂其情令曰登春臺者不期適而適遊醉鄉者不期樂而樂諸君其有意乎於是鳩工輪材因農隙以役民規於縣治之右其崇三十尺廣五十有八尺而深減廣之半中為閣以延高陽之徒後為便室以增壯麗之勢塗葺於壬申九月輟手於癸酉年正月樓成未名令曰是樓之設非以縱民之欲將以快民之欲也非以罔民之利將以迪民之和也人之喜莫喜於時和歲豐昔人嘗取其義以名詩今我揭其字以名樓何不可耶率然曰甚盛甚休乃復走書白其兄西昌丞君曰邑之令於兄有舊今又同寮幸及此意為我記之僕辭以不文不獲因綴其實以紀歲月夫由古以來莫不以作邑為難而為政之道亦不無先後次第今能從容不迫易其所難無一毫促急之政以感召和氣非材具不凡者能之乎迨撫字策勲又不忘所以納民於縱快酣適之地以為新吳山川無窮之壯觀可謂知所先後矣然則登斯樓也醉春風於四時詠華黍之遺意功將誰歸邑民嘗狀其政以借留又嘗載歌詩以序鄉飲不繫於建樓本末故不書令名國均尚書簡

肅公之孫故其設施皆有條理云嘉定六年八月十五日  
日記 按舊志古蹟云華豐樓在縣治南百步燬於元明

初甲辰知縣王溥建縣廳時官無廨舍寄居民間洪武三

年知縣余思濟建十四年知縣黃壽建譙樓五間宣德

九年知縣璩鎮海重建正廳及譙樓正統六年知縣袁彰

於廳後構堂三間仍名希宓景泰三年知縣劉讓重修成

化三年知縣謝煥改建六房東西各七間十二年知縣岑

方重建譙樓張元頤重建縣樓記事有所當為者而又有

時不可也際其時焉未得其人不能也得有其時焉未際其

為之時而為所當為之事則費不妄役不淹而民受其賜

矣嗚呼時之不可失人之不可遭其亦古今之通義歟奉

新南昌大邑賦稅訟獄往往倍厥隣境太平岑侯登賢科

而來尹茲邑既逾年凡事之當為者次第為之畧盡斯固



治之前有鼓樓歸然高峙下通一道舊架以木歲久傾圮  
 侯出入過之一旦顧謂僚屬曰環百里間皆吾之民有耕  
 者有織者有誦讀負販者又有奔走趨事不一其役在公  
 者晨昏之際咸惟更鼓是聽斯樓更鼓之在也有警乎民  
 最切將使惰者勉勤者息蓄奸懷慝者畏縮而不敢肆何  
 莫而非樓之功歟今若此不稱巨瞻烏乎可乃出俸資之  
 餘倡率僚屬墨石為臺構重屋七間高三丈四尺有奇深  
 三丈而廣倍之加半焉經始於成化丙申六月六日落成  
 於丁酉三月之望既堅既完不靡不麗壯乎舊觀邑之父  
 老咸喜侯有成績磨石介司訓嘉禾顧君望來徵予文以  
 紀始末昔張希顏令萍鄉更鼓分明獲知於范延賞而張  
 忠定公薦之奉新去萍鄉不遠侯之才視希顏亦不讓侯  
 之善者固不止此當道知而薦之有日則更鼓詎可以末  
 節細務視之而斯樓之作其可已哉若夫挹日月之尚輝  
 覽江山之勝概而寄興於落霞飛鷺之餘登高望者當自  
 得之侯之初志不與也侯名方字尚義先府君守潞州有  
 能聲邑丞王君琛判簿孫君智幕僚楊君忠司訓鄭君和  
 顧君望馬君晉皆能其官而樂助者他如耆彥秀民董役  
 輔義而凡有功於斯樓者亦皆  
 嘉靖元年知縣朱雲鳳  
 次第其名氏刻諸碑末是為記

東西吏舍三十六間十三年知縣胡億建通和堂

重建通和堂

和堂記縣堂之後為後堂積壤未新無以為委蛇地也嘉  
 靖甲午春二月今令胡公一庵由南海擢尹茲土下車以  
 始勵精圖治百廢漸興一日下令曰斯堂之新其不容緩  
 乎其役諸民乎堂新而民以病吾其忍乎無何有新興逸  
 民徐執中者性好忠義一聞斯令即願出其力以應公曰  
 義哉聽之遂集從事越明年正月而堂告成讐密鞏固軒  
 翔峻起制度壯麗公曰美哉因宴飲以落之而揭諸扁曰  
 通和予適家食屬予記予謂通和之義大矣以吾公意思  
 之吾民之福也烏可辭哉易曰聖人能通天下之志書曰  
 和恆四方民居師自古聖王為治不出此二者夫通則四  
 達不悖和則上下無間施之天下固無不可者況邑耶邑  
 之有令猶子之有父母也父母之於子饑寒哺煖疾痛撫  
 摩豈故為是姑息哉蓋通其情而和焉耳令苟不能視民  
 若子而以其情為情則饑者愚者輸者役者與者革者獄  
 者往往違悖將政用頽僻民用乖戾而治日以荒矣惡乎  
 令今夫水之流也去其壅淤則通氣之感也去其悖逆則  
 和一邑之中其為壅淤悖逆者何啻千萬倍唯賢令則推  
 而行之以通其窒順而利之以和其戾故情達而民以安

公心存公怒而政務簡易於凡設施措置之間所以求融洽乎民者靡所不至是故舉教養而正德厚生焉清獄訟而懲奸服慝焉省賦役而定則施功焉圖興革而盡利刻弊焉下至胥隸牧圉細微曲折亦惟本之以公行之以守之以誠使民志通而民心悅則自公之餘游焉息焉觀焉瞻焉真無愧於斯堂也公其賢令矣乎况使繼公而理者登公之堂觀公之區而以公之心為心則吾民之福曷駿乎始未艾也然則斯堂之新豈小補哉公名億廣西桂林人是

萬曆二十一年知縣馮挺建仕學齋於通和堂西為之記

建龍亭庫於通和堂東尋燬

國朝順治八年知縣王家楨因譙樓頽廢移石修砌馮川橋改造今門十七年知縣黃虞再修葺吏舍及戒石亭康熙元年復建譙樓自為記二年移建廨舍於通和堂後縣廳及幕廳丞捕二廳慎儲庫土地祠寅賓館俱從新構造仍

建六房於舊址五十九年譙樓圯知縣鄭毓謀改建平屋

三間乾隆四十一年知縣甯有誠借養廉重修此縣署沿

革大畧也今制正廳榜曰忠愛堂舊名承宜道光三年知縣鄒

山立捐廉重修堂之左有廨曰贊政廳堂右為慎儲庫前

翼東西兩夾道中為甬路立戒石坊甬路兩旁有耳房各

一間為值役站立之所夾道兩廊左為吏戶禮承發架閣

房右為東兵刑工房前為儀門正廳後為川堂堂後為宅

門門內為觀我堂左右亭軒額名不一輒以時為興廢其舊

跡已廢者曰冰壺堂曰清心閣曰靜治堂曰捲雨閣曰學愛堂曰恭寬溫恕之堂曰中和堂曰景崔堂曰媚春堂曰棠英亭曰永清亭曰競春亭曰玉色亭曰生香亭曰集芳亭曰讀書齋曰無倦齋改為簿尉廳者曰審是堂曰退思

亭曰三經堂曰學古齋曰澗軒曰尚論亭 來汝賢嘉樂  
堂查正丁糧格冊記此縣冊弊胥吏率以遲日月為利司  
籍者不復稽案束手與之使衣食其中是故三年而未成  
也飛懸詭漏之奸百變而民不勝其弊矣七月余歸自西  
昌受訟者之懇擇子弟之敏事者六人與之酒使舍家事  
朝夕分鄉按籍而躬督磨之凡七浹旬飛懸詭漏咸自斷  
正復得隱糧五百六十石有奇登下生死丁口伍倍之餘  
糧七十三石歷世久無所歸留待民之墾田者否則官為  
之處散諸叻晦視鄉之數別為格冊十二間長縱而編氓  
橫統之也甲與首與鄉都各書其總以達於縣賊可知矣  
慎藏之勿使私易一年入徵十年治役有弗均者乎此六  
人者可謂任怨畢公矣用書其名曰王元道廖典哲徐廷  
爵徐廷哲廖嚴徐廷蕃紀勞也 李法尚論亭記余侯韓  
班以楚攸名宿撥高第縮符治吾鄰邑下車未數月政和  
教與頌聲翁然余時定省假居里開距新吳才百餘里侯  
以疇昔論文投分叱肩與致余於署下榻東偏書塢之尚  
論亭尚論亭者前隴右泰升黃明府之所扁也八角四廳  
明光瑩徹亭外闔敞照綴設色有蕉有石有松有竹有古  
桂餘香繞棟有芙蓉兩株爭妍競麗千蕊朝新不與秋光  
俱老下更有金折寒枝橫斜離奇冷豔清絕逞拒霜之精

神貞晚香之幽抱芳隣待我真有情耶一日侯手一編示  
余曰此余所輯邑乘也稿甫脫君適至為予政之且願乞  
殿廷校書手一辨其帝虎陶澠也余受而讀之移几撤  
闔丹鉛列設木蓮煥發錦城綵幄疎籬黃菊如侍如揖伴  
影亭中言浹旬日既喟然歎曰夫志難言矣自郡邑以來  
何地無志何代不修志汗牛充棟曷可勝計願荒遠罕傳  
書矣近時惟靈壽儀真兩志二陸巨手實稱鴻製又穆堂  
李先生所編之臨川縣志莊恪甘公與穆堂後先刊定之  
廣西通志才學識兼長擅美堪垂師法外此或失則濫或  
失則穢鮮足觀采小史外史云乎哉是編莊恪家宰曾發  
凡授其嗣君愛廬主政為之稿未及行侯得據為胎坯文  
可徵矣復廣延邑先達蒐羅讎校公慎明備獻可徵矣於  
是斟酌乎臨川廣西之前規損益乎稼書麟度之成式定  
為體例以雅以飭彬彬焉龍門扶風相與揖讓誠善志也  
已奉新縣與吾邑接壤賢哲相望余嘗讀胡仲蕃宋南唐  
鄧夢虹余方泉蔡恭肅帥五寶甘莊恪諸公奏議立朝風  
節後先照耀高山景行輒勞夢寐及把西山老人集平淡  
編藍溪詩燕林藏稿又竊歎著書立言者必卓然自名一  
家矣若夫雙川之學行方嚴中庸誠明之踐履篤實與夫  
鄉清隱遊心造物毛賢萬鼓氣嚴壘廖道長襟懷灑落綽

有晉人風致每西望越王百丈諸山慨然想見其為人茲  
乃得於書塢中哀集琳琅一亭晤對崑山鮫室應接靡暇  
一大快生平襟懷歟昔濂溪周子蘇長公山谷道人蹠涉  
軌澤偶涉是邦餘韻風流遂足為山川生色迄今瞻祠貌  
尋詠歌心嚮往之不能置先曾王父榮祿大夫濟源公與  
邑宗人繩文伯仲講棣萼之好康熙丁卯歲以居太夫人  
憂自贛署移家於此愛其水泉風土將卜築焉居二年所  
交前輩帥備皆陳文在王京師最稱稠善文酒詩歌發揮  
名勝墨藩藉藉猶有遺跡嗣起復厥歷四方先王父奉直  
大夫蒼霖公亦令牧中州挈眷之任後歸西江遂隸籍新  
建初志弗果距今六十年往藐予小子萍遊其地故址不  
可復識宗人子傲南宦轍東西今又為蜀人矣惟帥陳王  
三族書香奕葉衣冠鼎盛然而年遠人遙脫令咨以先世  
友誼當亦無有能詳述之者意可慨已顧余雜誦茲編低  
徊往事謬襄參考悉心尚論因緣不可謂不偶也既卒讀  
撫卷流連未能遽釋忽見當頭皓月雲淨霜清碧落參橫  
女牆花睡漫吟一篇曰皎皎霜月白盈盈如我心中天絕  
雲翳萬里俯高岑慷慨發長嘯踞石還微吟莫奏霓裳曲  
清虛鑒浮沉吟畢書於亭壁俟出見而善之因曰泰升去  
九十年矣泰升之志我修之君政之君政之泰升之塢之亭傳舍

者不知凡幾人矣君寓之君能吟而題之前此遠遊者亦  
相待耶且茲花若月流霞散綺澄霽昂昂偏若助君尚論  
者非無意也是皆不可以不記余笑曰唯 楊萬里登清  
心閣望雨詩閔雨喜見雲喜雲愁不雨長風將怒點慰此  
樓中暮喜雨不但人松竹亦鼓舞未知今年熟得似去年  
否 清永亭詩桃李一年春事休綠陰亭外儘清幽草花  
盡日幾開落山鳥無人自唱酬未必喧嘩不到耳頗因名  
利懶低頭祇今宦業紛如許轉眼春光似舊遊 問月亭  
詩雨後林中別樣涼恣行幽徑不知長風蟬幸自無心事  
強為閒人報夕陽 李平綠篠閣詩野草春來觸處肥山  
花秋到又還衰爭似閣前栽綠篠青青不用歲寒移 歐  
陽竦前題四時長是翠陰多冒雪凌霜不改柯勁節虛中  
無所得直須留待鳳皇過 吳荀前題愛師無事足詩才  
一閣清風向竹開應笑門前車馬客幾人能到此中來  
梁立賢前題閣野森森聳萬筠葉中帷幄翠 內署之北曰  
於雲高僧達性空如竹盡日忘言對此君  
形勝樓 朱雲鳳形勝樓詩百尺和雲迥千山入翠迷朱費  
篋搖戟亂碧樹結烟齊星月來層漢琴樽聚五奎遙瞻青  
瑣闥咫尺覆蒼黎 沈君楨形勝樓梅花詩老梅蒼幹立

牆東偏產靈芝丹點紅古澹香芬蘭比潔高凝色絕碧凌空陶潛已去辭身外何遜應來賦閣中名士縱多詩酒興落花應謝曰愛日堂曰思補亭嘉慶二十五年知縣鄒山善春風

立捐廉叔建極北有三公祠周圍崇垣內隙地左為倉廩右為馬廐儀門之左為靈官祠又左為土地祠右為廣仁倉倉後為獄乾隆四十五年詳准部撥鹽道庫銀三百五十三兩零添建四間并修葺舊十五間儀門直出為大門門外左為旌善亭右為申明亭旌善亭之左為鄉約所又左為

上諭亭乾隆元年知縣趙知希捐俸四百兩創建自記趙知希捐

上諭亭碑記 國家深仁厚澤維有歲年越我

皇上聰明睿聖神文武是創是作乃繼乃承論決之微

之妙上及飛鳥下及潛魚矧茲黎民有不徧為爾德者哉

臣知希謬膺民社每慚謏陋仰承

聖訓之煌煌暨上憲之諄諄庶幾率循用以無咎月且之吉敬

謹讀法矣而山陬聚落亦復躬率鄉耆勤宣厥道第

宸章下賁而供奉無其所茅簷葺屋非所以重

君貺也撫臣常安念之用飭各屬建

聖諭亭一所臣知希謹捐養廉銀四百兩擇於縣治之東皇華亭

舊址鳩工庀材始自七月十五日凡兩閱月至九月十九

日告成中為堂三間前牌樓一座計三間後殿三間圍圍

周固殿供

龍亭一座常懸  
諭旨三十條繼自今頒發者陸續刊掛務期鄉民悉見悉聞咸尊  
聖諭猗歟盛哉聆  
巽命於庭除對  
天顏於咫尺理簡而用普義精而文明誦服之深行習俱適臣  
知希幸親康衢爰拜手而為之記 按亭舊址前窄後寬  
知縣趙知希建亭時論廖航孫等改狹店屋數尺亭乃方  
正給易地執照除亭後左側牆外滴水二尺其餘許航孫  
等砌管

慎儲庫在縣堂右明嘉靖八年知縣陳仲錄創建

國朝順治十七年知縣黃虞再重建

丞署在縣治東久圯宋紹興三十二年以尉廳爲之在縣治內淳熙七年改建於縣治西北燬於兵明洪武三年仍遷於縣廨之東

國朝康熙二年重建廳後爲廨乾隆四十七年縣丞江瑤詳請借廉修葺五十七年縣丞王澧借養廉修葺道光三年縣丞徐統藩詳請借廉修葺

典史署在縣治內宋紹興三十二年改爲丞廳尉劉源儼居民舍明洪武三年仍遷入縣治內丞廳之前

國朝康熙二年改建於縣治之右乾隆四十三年典史錢元銓詳請借廉修葺

巡檢署在縣西六十里進城鄉羅坊鎮明洪武元年巡檢王良玉剏濶八丈深十五丈周圍四十六丈宏治間本府通判應尹重修歲久圯僦民舍以居

國朝雍正十三年巡檢周篤生於原址剏廳廨悉復舊規乾隆四十七年巡檢馬厚培詳請借廉修葺

僧會司在東門外乾隆元年崇果寺僧會心靜捐建嘉慶五年燬今廢址存

道會司 舊志不載地址無考 以下俱公廨

操場在縣治馮水之南舊有演武亭久廢乾隆五十六年

合邑重建

知縣趙增序

國家文教覃敷不忘武備由省而郡而縣胥構亭講肄三年校士於斯四時練卒亦於斯規制皇然軍容整暇使人履

其地而敬其事以儲

盛世于城之選顧不重哉攻奉邑圖記會建亭於馮川南畔

歲月已久傾圮無存後之蒞事者僅僅張帷設幕取辦臨

時遇上兩旁風無所障蓋迄不能終事焉夫修墜舉廢治

化攸關固有司之責然非邑紳士嚮風慕義樂為將伯之

呼則築室道謀集事良非易易予甫蒞茲土求治不暇又

何敢遽興工作乃眾紳士因公接見凡邑中前歲遺軌有

裨於政教者指陳商確咸願次第興修而以此亭為尤不

可緩眾議僉同於予心若有合焉爰集同寅汪君彭君暨

邑紳士相其舊址縱橫若干丈培之使高構是亭於其上

更立武廟於後所以荷神庥而敬武事是役也復舊

制煥新模以仰體

聖天子不忘武備造就人才之至意至於鳩工庀材計值不貲

除薄捐廉俸以當嚆矢揆諸同志無不慨解已囊爭先恐

後予惟聿觀厥成嘉眾紳士踴躍樂輸之誠益以見嘉慶

朝廷休養生息涵濡百數十年之深也

年間歸德鄉捐送進城鄉澤溪香火田租三十九石

養濟院額設孤貧三十七名口糧於地丁銀內撥給院在

縣治北門外明嘉靖間知縣陳仲錄叔隆慶間知縣陳雋

修崇禎十三年知縣沈君楨復建後圮

國朝乾隆二年知縣趙知希捐建門樓一所兩邊土牆正屋

一重兩間正屋前靠東房屋七間靠西房屋四間道光三

年官紳士民公捐建房屋二十二間嘉慶二年廩生廖為

淞偕弟捐置新興鄉張坊田租六石嘉慶十五年職員陳

連魁捐置建康鄉均上晚田二號計租四石廖家邊早田

于演武亭

一號計租二石五斗養濟院普濟堂分收道光二年職員  
 陳世瑜偕弟監生陳世珂遵祖為溥父盛任命捐置洲子  
 上等處八斗桶田租九石四斗道光三年監生熊履泰鳴  
 鳳廩生鳴鳳童生應龍捐建康鄉杉林里田租六石熊衍  
 球承祖母方氏父職員達先遺命捐建康鄉塔背田租八  
 石八斗養濟義濟二院分收陳鍾錕鍾選金生承父監生  
 以德命捐建康鄉板橋田租九石養濟義濟二院分收  
 普濟堂在縣治西關外離城里許蕩城上坐北向南土庫  
 房屋二重直出共計廳堂二所正房四間過口二間廂屋  
 六間周圍牆垣完固牆外基地二塊其地東至西九丈南

至北五丈五尺屋後中田二分上栽椿樹一十六根乾隆  
 二十三年州同蔡奏功捐銀一百四十兩價買廖姓屋基  
 建置其收養老人支給工食係貢生彭煜及士民等捐助  
 銀兩一買店屋三間在化橋上坐南向北計地三畝零每  
 年額交賃銀二十兩一買進城鄉湖頭洲晚田一十一坵  
 計下田四畝零又陞科下田三畝五分每年額交平斛租  
 穀四十石乾隆二十五年鄧仁孫等捐助南關內靠城向  
 西店屋二間每年額交租銀六兩嘉慶二年廩生廖為淞  
 偕弟捐置新興鄉石巷里田租五石六斗按貢生彭煜等  
 捐助銀兩置買  
 田店其每年所收銀穀原為普濟育嬰二堂工食之用嗣  
 因嬰孩收育寥寥所有銀穀均歸普濟堂支收附記於此



道光二年陳世珂世瑜遵祖父命捐置奉新鄉田租六石育嬰堂舊在馮川橋東里許廢址存今在東門內河湖井旁坐北向南房屋二重共計廳堂二所正房五間廂房三間橫頭門一重廝屋二間周圍墻垣屋宇俱完固乾隆二十三年貢生蔡秉寬捐銀一百二十四兩契買余姓屋基建置又是年監生鄒錦鄒毅捐輸中田一畝八分零每年額交平斛租穀三石四斗三十二年監生帥步雲捐田一畝二分堂內如無嬰孩收養其每年所收租穀撥普濟堂支用

義濟堂在北關外西北距城里許痲瘋居之舊北關外有痲瘋茅屋兩間乾隆三十九年士民劉煊仁等以路當孔道穢形昭著因勸衆姓樂助銀兩價買廖姓荒山一塊稟請知縣婁起銓築屋數間令痲瘋移居於此名曰義濟嘉慶二年廩生廖爲淞偕弟捐置建康鄉杉林里田租四石七斗五升道光三年監生熊履泰鳴鳳廩生鳴鳳童生應龍捐建康鄉鑪溪田租九石道光二年陳世瑜世珂遵祖父命捐置奉新鄉八斗桶田租九石五斗廢署

布政司分司在縣治東二十步舊爲館驛明正統八年知縣袁彰改爲分司天順八年知縣謝煥建廳廡極宏敞東

西橫濶九丈周圍三十六丈崇禎間廢址存其地長四十二丈四尺寬二十八丈

國朝乾隆三十年紳民人等租地建屋每歲額徵租銀六兩  
南昌道分司府志作按察司在縣治東南百步明洪武三年知縣

余思濟修繚以崇垣廣十四丈深二十二丈五尺周圍七十三丈宣德間知縣璩鎮海修成化五年知縣謝煥重修  
今改爲漕倉地

主簿廳在縣治右宋咸平四年主簿向湍建明洪武二年  
遷入縣治內今裁

白沙場頭巡檢司在縣治西七十里地名富溪今廢

稅課局在縣治東明洪武間知縣張時敏大使華容祖改  
建於縣市西南二百步今裁

監務廳在縣市東南宋縣令張國均剏後改爲華豐樓元  
季燬

陰陽學舊在縣治東二十步明天順七年知縣謝煥遷於  
縣東二百步嘉靖元年知縣朱雲鳳修今廢址存

醫學在縣治東十步明嘉靖二年知縣朱雲鳳剏今廢  
惠民藥局在縣治東十步今廢

寅賓館在儀門之左土地祠之前明隆慶五年知縣陳雋  
剏萬曆十四年知縣沈天啟增修

國朝順治三年知縣孫士安修十七年黃虞再重修今廢  
皇華亭在縣治東卽惠民藥局故址康熙二年知縣黃虞  
再創歲久圯今改建爲

上諭亭

迎恩亭在縣東門外二百步明嘉靖元年知縣朱雲鳳創  
今廢

各鄉旌善亭申明亭凡四十一所今廢

會館

附

京師奉新會館在京師前門外東河沿坐南朝北並列兩  
所康熙六年有本邑流寓盜典與京民鄭衡居住五十一  
年邑紳張懋能鳴官捐銀一百一十五兩贖取今額曰奉

新東館

奉新南北二館在正陽門外之西宣武門外稍東驛馬市  
大街之南地名菓子巷兩宅相連前後各開大門一在四  
眼井路西坐北向南廳房三進兼廂房計二十間額曰奉  
新南館一在羊肉衚衕坐南朝北廳房兩進繞以羣房計  
十九間額曰奉新北館乾隆二十六年邑人刑部郎中涂  
錫禧候選郎中彭肇祚等倡首捐銀合各鄉樂助共銀一  
千一百兩餘置買契存涂錫禧家嘉慶甲戌北館火存頭  
門三間廂房二間

按奉新三館或半就傾圮或毀於  
回祿修復宜亟是所望於好義者

防汛

奉新汛原於順治二年裁減提標奉新營

府志作康熙二十二年改

設奉新汛歸入南昌鎮標前營管轄額設把總一員防兵

一百名自備馬二匹營馬六匹雍正四年添設外委一員

舊志作雍正七年

嗣於嘉慶年間改歸南昌城守協管轄協防外

委一員領騎戰馬一匹汛內戰守兵丁九十八名

駐防廳舊在縣西五十步康熙間有因事入官書屋置為

廳雍正初防守張甫乘弗居遂廢址存今駐防廳在縣治

東明正統八年知縣袁彰創為館驛隆慶六年知縣陳雋

改為府館崇禎十二年改為奉新營

國朝順治二年營裁十七年知縣黃虞再重修仍爲府館康熙間改爲察院公所二十二年復設教諭於是居焉五十五年爲訓導康安國署乾隆元年訓導文律遠捐葺十年訓導署移入學宮十五年防守宋瀚指葺居此道光元年把總江發魁倡修余潮汎應記奉新東接省會密邇才百餘里前明嘗於此立營設守備捍衛順治二年裁營改汎歲委弁駐防其地潮更制迄於今甲子將再週矣無債事無不及事謂非防制盡善乃爾耶願有弁則宜有廳謀其廩祿謀其室家然後可使自謀其身心以急公而任事不然弗暇也位有崇卑體臣之經應無二理矧夫弁也有鈴束兵丁差操更調之責有保障城池倉庫監獄譏竊發備不虞之任有盤詰奸宄緝拏盜賊護解囚徒之役非漫不事事者無廳事事何以聽令何以行奉之防守僑寓寺觀予甫履任見而感焉旣徐考之蓋縣東二百步舊有營後裁爲府館康熙間又改爲察院公所嗣訓導康安國暫借爲修理棲息其中乾隆十年邑孝廉蔡

尚才昆季捐修學宮崇聖殿并叔學宮齋舍訓導移回其廡空闕汎弁先是城西有宋某緣事入官書屋置爲廳雍正初防守張甫棄弗居遂傾頽積瓦礫始相沿借賃至今弗改夫弁薪俸無多負非所力辦且騎技場牧寺觀鮮宜况無定居公私煩累予與今防守宋君瀚熟籌之相度舊營雖支離損壞猶有門廡堂室間架磚瓦可因仍俾有用也予議捐養廉爲之完繕宋君亦慨然捐俸十金襄厥事爰請於上臺報可庚午冬命役徒匠石補苴墜茨整飭墻垣施黝堊復舊觀不匝月工成於是呵衛有地棲止有所芻豢有閑校閱有場規模宏敞體統嚴肅夫而後馳驟王事者室家安處廩祿罔虞身心無所紛而靖共之念一也欲其謀人者詎可不先急其所自謀也乎哉於是乎記按駐防廳頭門左側原有三聖廟舊志未載道光三年把總袁凱捐貲重修今據移文附載於此

協防廳在東關延恩寺右

塘房九仙塘在縣西百一十里 西塔塘在縣西百三十

里 此二塘俱屬奉化鄉係原設

鑾岡塘在縣南二十里屬南鄉 羅

坊塘在縣西六十五里屬進城鄉

此二塘係乾隆五十四年添建

鋪兵總鋪鋪兵五名 三溪鋪鋪兵三名 九梓鋪鋪兵

二名 山口鋪鋪兵二名 下陂鋪鋪兵二名 渣村鋪

鋪兵二名 遊路鋪鋪兵二名 羅坊鋪鋪兵二名 路

口鋪鋪兵二名 黃沙鋪鋪兵二名 礪面鋪鋪兵二名

九仙鋪鋪兵二名 茅岡鋪鋪兵二名 鑾岡鋪鋪兵

四名 府志作二名另有檉榔鋪鋪兵二名今檉榔鋪久廢 桃樹鋪鋪兵三名 陽

烏鋪鋪兵四名 界牌鋪鋪兵二名 界竹鋪鋪兵二名

烏嵐鋪鋪兵二名

哨所凡二百丈哨在奉化鄉百丈寺之西三里順治二年

裁其一五顯哨久裁

驛馬原額三十匹乾隆二十四年奉 部議奏事案內裁

馬五匹乾隆四十一年奉文抽撥分宜縣馬一匹現額二

十四匹

馬夫原額九名乾隆二十四年奉 部議奏事案內裁夫

二名現在馬夫七名

走遞人夫原額一百名雍正十年奉 部敬陳管見事案

內裁夫二十名現在八十名

秩祀

社稷壇舊志云在縣治西北宋至道二年縣令徐用和遷縣南五百步天聖中縣令查延之復遷縣東三百步明洪武三年縣令余思濟改築於縣治之西二里許歲久圯嘉靖元年縣令朱雲鳳重剏

國朝雍正二年刊圖頒行雍正十年知縣趙知希遵部頒式累石爲壇高二尺一寸縱橫各二丈五尺四出陛各三級繚以短垣環蔭松樹四面爲門飾以丹從北出入壇設石主二長二尺五寸方一尺立壇土中不鐫神號外置木主二高二尺四寸寬六寸座高五寸寬九寸五分一書縣社

之神一書縣稷之神

時日順治元年定每歲春秋仲月上戊日致祭十五年復定時辰用上戊日子時

齊戒前期凡一應執事官員人等各於家致齊三日按大清會

典凡致齊大祀三日中祀二日小祀不懸齊戒脾亦不致齊所戒不理刑名不宴會不聽音樂不入內寢不問疾不吊喪不飲酒不食葱韭薤蒜不祈禱不報祭不祭墓其有灸艾體氣殘疾瘡毒未愈者俱不許陪祀

祝文乾隆九年頒定文曰維神奠安九土粒食萬邦分五色以表封圻育三農而蕃稼礱恭承守土肅展明禋時屆仲春秋敬修祀典庶九九松柏鞞磐石於無疆翼翼黍苜佐神倉於不匱尙饗

陳設雍正二年頒定每位用黑色制帛一白磁甗三羊一

豕一鉶二簋二簋二邊四豆四

祭品鉶實和羹簋實黍稷簋實稻粱邊四實形鹽鱮魚棗栗豆四實韭菹醢醢菁菹鹿脯

祀儀乾隆四年頒定正祭日各官具朝冠朝服至壇贊禮生引至行禮處通贊唱排班承祭官及各官排班立唱班齊瘞毛血迎神贊引生贊跪叩興承祭官及各官俱行三跪九叩首禮興通贊唱奠帛行初獻禮贊引生引承祭官詣盥洗所盥洗畢詣酒尊所司尊者酌酒詣司社神位前承祭官至案前立贊引生贊跪承祭官跪贊獻帛司



帛生捧帛跪進承祭官受帛拱舉獻畢贊引生贊獻爵司  
爵者捧爵跪進承祭官受爵拱舉獻畢贊引生贊叩首興  
承祭官叩首興贊引生贊詣 司稷神位前承祭官獻帛  
獻爵如前儀畢贊引生贊詣讀祝位承祭官詣讀祝位立  
贊引生贊跪承祭官及各官皆跪贊讀祝文畢贊叩興承  
祭官及各官俱三叩頭興贊復位承祭官就原位立通贊  
唱行亞獻禮贊引生贊詣 神位前獻爵如初獻儀畢贊  
引生贊復位承祭官復位立通贊唱行終獻禮贊引生贊  
詣 神位前獻爵如亞獻儀畢贊引生贊復位承祭官復  
位立通贊唱飲福受胙贊引生贊詣福胙位承祭官就位

立捧酒胙者至福胙位右旁跪接酒胙者在左旁跪贊跪  
承祭官跪贊飲福酒承祭官受爵拱舉授接爵者贊受胙  
承祭官受胙拱舉授接胙者贊叩興承祭官一叩頭興贊  
復位承祭官復位立通贊唱謝福胙贊引生贊跪叩興承  
祭官及各官俱行一跪三叩頭禮興通贊唱徹饌送 神

贊引生贊跪叩興承祭官及各官俱行三跪九叩頭禮興  
通贊唱讀祝者捧祝司帛者捧帛各詣望瘞所唱望瘞贊  
引生贊詣望瘞所承祭官至瘞位立祝帛焚半贊禮畢退

神祇壇

按舊制本名山川壇嘉慶十六年奉部文更正

舊在縣治南市登仙坊之

西明洪武三年縣令余思濟築於縣治之南以瀕水不便

卷三  
十七年縣令屠仕宏改築於縣治北歲久傾圮僅存遺址  
嘉靖元年縣令朱雲鳳復創

國朝順治初定風雲雷雨山川城隍之神共爲一壇雍正二  
年定安設神位風雲雷雨之神居中山川之神居左城隍  
之神居右其壇制與社稷同上立石主三如制外置木主  
一書風雲雷雨之神一書境內山川之神一書本縣城隍  
之神

時日順治初定每歲春秋仲月上戊日致祭

齊戒與社稷壇同

祝文乾隆五年頒定文曰維神贊襄天澤福佑蒼黎佐元  
化以流形生成永賴秉氣機而鼓盪溫肅攸宜磅礴高深  
長保安貞之吉憑依鞏固實資捍禦之功幸民俗之殷盈  
仰神明之庇護恭修歲祀正值良辰敬潔豆邊祇陳牲帛  
尚饗

陳設雍正二年定每位用白色帛一白磁爵三共用羊一  
豕一釧二簠二簋二邊四豆四

祭品與社稷壇同

祀儀雍正二年奏准與社稷壇同

先農壇在縣治西二里雍正四年知縣王藩奉文建壇高  
二尺一寸縱橫各二丈五尺壇後正房三間中奉神牌牌

高二尺四寸寬六寸座高五寸寬九寸五分紅牌金字填寫先農之神其兩翼爲庫房存貯祭器農具之屬壇之前爲耜田四畝九分塘一口每歲耕耜致祭

時日雍正四年定每歲季春亥日致祭

齊戒雍正五年定先期主祭及各官俱致齊二日

祝文乾隆五年頒定文曰維神肇興稼穡粒我烝民頌思文之德克配彼天念率育之功陳常時夏茲當東作咸服先疇洪維九五之尊歲舉三推之典恭膺守土敢忘勞民謹奉彝章聿修祀事惟願五風十雨嘉祥恒沭於神庥九穗雙岐上瑞頻書於大有尙饗

陳設雍正四年定每歲致祭用帛一羊一豕一釧一簋二簋二邊四豆四酒罇一

祭品與社稷壇同

祀儀雍正五年定照社稷壇例行

雩祭乾隆七年定每歲孟夏舉行常雩之禮不另立雩壇卽於先農壇行禮並合祀社稷山川諸神牌

時日乾隆七年定每歲以四月十八日致祭

齊戒乾隆七年定主祭及各官先期致齊三日

祝文乾隆九年頒定文曰恭膺 詔命撫育羣黎仰體

彤廷保赤之誠勤農勸稼俯惟蒞蒞屋資生之本力穡服田

令甲爰頒肅舉祈年之典惟寅將事用申守土之忱黍稷  
惟馨尚冀明昭之受賜來牟率育庶俾豐裕于蓋藏

陳設祭品祀儀與先農壇同

文昌祠舊在大成殿左後移祀於魁樓嘉慶六年奉

旨列入祀典定爲每歲春秋仲月二次致祭祀儀與關廟同九

年建祠於縣治西昭德觀之左十年建康鄉職監熊國理

捐送社下園晚田租十四石烏嵐園早田租三石北鄉冷

超珍捐送早田租十六石以爲歲修之費

祝文嘉慶六年頒定文曰維神蹟著西垣樞環北極六匡

麗曜協昌運之光華累代垂靈爲人文之主宰扶正久彰

夫感召薦馨宜致其尊崇茲屆仲春用昭祀事尙其歆格

鑒此精虔

文昌帝君後殿嘉慶六年奉文帝君三代姓名無考未便

請加封號謹擬增置神牌一分牌面書文昌帝君先代神

位字樣祭日先詣後殿行禮式如關帝後殿

祝文嘉慶六年頒定文曰祭引先河之義禮崇反本之思

矧夫世德彌光延賞斯及祥鍾累代炯列宿之精靈化被

千秋偉人文之主宰是尊後殿用答前庥茲值仲春肅將

時事用申告潔神其格歆

關帝殿明洪武間因縣尉廳改建萬曆十年知縣朱南英

重建四十六年教諭岑昌運訓導萬賓復建後殿

國朝順治九年

勅封忠義神武關聖大帝乾隆二年知縣趙知希重修前後殿乾

隆三十三年

加封忠義神武靈佑大帝嘉慶十九年

加封忠義神武靈佑仁勇大帝

時日順治元年定每歲五月十三日致祭雍正三年定每  
歲除誕日外春秋仲月二次致祭

祝文乾隆九年頒定文曰維帝浩氣凌霄丹心貫日扶正  
統而彰信義威震九州完大節以篤忠貞名高三國神明

如在徧祠宇於寰區靈應丕昭薦馨香於歷代變徵異蹟  
顯佑羣生恭值嘉辰遵行祀典筵陳籩豆凡奠牲醪

陳設與 文廟正位同

祭品與 文廟同

祀儀雍正五年定承祭官行三跪九叩頭禮乾隆九年定  
正祭日各官具朝服齊集陰陽生報鼓三次贊引生引至  
行禮處通贊唱執事生各司其事承祭官就位陪祭官各  
就位立通贊唱迎神各官俱行三跪九叩頭禮興通贊唱  
奠帛行初獻禮贊引生引承祭官詣盥洗所盥洗進巾詣  
關帝神位前上香獻帛獻爵如 文廟儀畢贊叩首興承

祭官一叩頭興贊引生贊詣讀祝位承祭官至祝位立讀祝生捧祝文立於案左贊引生贊跪承祭官及各官皆跪贊讀祝文讀祝生跪讀畢贊引生贊叩興各官俱三叩頭興贊復位承祭官復位立通贊唱行亞獻禮如初獻儀畢行終獻禮如亞獻儀畢唱辭神承祭官及各官俱行三跪九叩頭禮興通贊唱讀祝者捧祝司帛者捧帛各詣瘞所望瘞如文廟禮畢退乾隆五十五年州同廖廉捐送均上早晚田租十石六十年廩生廖爲淞貢生爲楹生員爲楹承父監生謨遺命捐田租六石二斗五升以爲經費關帝後殿雍正三年

加封關帝三代曾祖光昭公祖裕昌公父成忠公皆供奉後殿五年定每歲三次致祭

時日三祭與關帝同

祝文乾隆九年頒定文曰維公世澤貽庥靈源積慶德能昌後篤生神武之英善則歸親宜享尊崇之報列上公之封爵錫命優隆合三世以肇禋典章明備恭逢諏吉祇事薦馨

陳設雍正五年定不用牛餘照前殿

祭品與前殿同

祀儀行二跪六叩頭禮餘同前殿儀

邑厲壇在縣東北百步明洪武三年縣令余思濟勦築歲久墜廢嘉靖元年縣令朱雲鳳復建四圍繚以垣墻壇高二尺五寸縱橫如之南出陛三級中建修祀房三門樓一國朝順治初定每歲祭無祀鬼神於本城之北郊歲以清明日七月十五日十月朔日用羊三豕三飯米三石香燭酒紙隨用祭時祭告城隍之神雍正三年添設飯米共九石里社壇鄉厲壇明初定制每里一所祀五土五穀之神舊里社壇一百五十三處鄉厲壇四十一處今或存或廢八蜡壇乾隆間每歲致祭十一年奉文不行蜡祭其祀廢城隍廟在縣治北門外宋天聖四年縣令張維周主簿晏

竭修右軍判官危佑記治平三年縣令丁靖增修邑人鄒軻記元季燬碑刻不存明洪武三年知縣余思濟重建永樂九年知縣楊丹珉正統四年知縣王在明景泰四年知縣劉讓宏治十九年知縣王翊正德四年縣丞何永清相繼修葺萬曆二十一年知縣馮燧復建正殿寢殿正殿之左有觀音堂右爲官房後廢其兩翼爲十二鄉社令祠前

爲儀門

邑人甘懋德建後裔重修

儀門之左爲土地祠右爲丁公祠

甘汝

來重修城隍廟儀門碑記歲之夏邑當事及縉紳諸公既經營城隍之後殿事始竣余族人瞻廟門之舊也將改作焉而詢於余余惟城隍之祀古國社之遺也神之司乎民也水旱疾厄則司之是非善惡又司之職固綦隆哉廟固綦重哉今有人豐其室而陋其門居之必不安也而況於神乎且是役也實爲余族人是勗以余族祖竹岡公始

故也竹岡公諱懋德明舉人令錫邑好善樂施茲其布金地

本朝順治明經崧公等修之迄今棧題滄爛殆不可支斯舉

也報神之德承先之思蓋交重云余備官於  
朝間諸南來者曰方工之始作也族之人相與言曰惟廟門  
屹屹不丹不覆其風氣衰散亦唯是之故釀費於衆夙夜  
鳩工迺板迺築無有或後則又相與言曰凡工之成極難  
庶後世無輕廢亦唯賢族人是賴乃續前修俾無墜緒以  
垂永久既成乃畀余記於是乎不獲辭而執筆以從余惟繼  
自今廟門之崇煥神之靈曰惟汝予功其告於祖祖之靈  
亦曰惟汝予功乃所謂交相重也是不可以不記記之以  
告後之爲族人者至倡督之人斂費之數別有刊不具書

國朝順治十七年知縣黃虞再重修康熙二十五年知縣王

景賢重修乾隆二年知縣趙知希以後殿傾廢捐俸倡修

嘉慶二十三年知縣姬學周倡修權縣事吳名鳳爲之記

每歲祭無常期自春秋二仲合祀於山川壇外每歲厲壇

祭日皆主其祭至水旱祈禱官司泄任皆特祭焉趙知希重建城

隍廟後殿記聖王之治天下也先成民而後致力於神今  
郡國所祀城隍殆卽古者祭其本境山川之義載在祀典  
其秩分視守令埒余來令新吳下車日齋宿於城隍廟  
距城北數武踞龍山之顛俯瞰城邑戶井繡錯舊制頗稱  
宏麗歷年既久風雨剝蝕半就傾圮而後殿則廢址僅存  
付之荒烟蔓草間嗟夫以神之明德稟國家之威靈莫綏  
茲土其所以佐 景運而福民生者視令當無以異今令  
得受精詔祿有安居退食之樂而神寢息無地露處荆莽  
間此非獨令之責抑亦大非

朝廷攸崇祀典之意矣爰捐俸畀諸寺僧俾其經理以董事

勿敬功迄無成於是趙生大鵬等慨然念之召百丈僧道

文竭誠募化余復捐俸以爲之倡仗神之靈善信雲集迺

庀材鳩工仍舊址而新之爲屋三楹檠桷櫺檻塗茨丹雘

之屬計費工以四百計其大殿門樓之朽蝕者則易而新  
之始工於乾隆二年九月迄四年四月乃竣事夫惠本而  
民歸之志民和而神降之福此祀神之義也新吳僻在山  
壤比歲以來雨暘弗愆豐登屢慶令自愧功德涼薄不足  
致福於民抑神實默相而助勦之俾得黽勉此邦藉以昭



聖天子先成民之盛治是舉也新吳之人踴躍而起功若子趨  
 父事雖神之靈爽淪浹於人者深故眾志歸而制度舉蓋  
 亦深有合於聖人以前人道事神之義矣殿成僧來乞言於  
 余遂書此以為之記董事趙大鵬提緣僧道文例得附書  
 吳名鳳重修城隍廟記古者營石為城浚池為隍以衛  
 疆域以資保障神式憑焉載在禮典各邑建廟城中度申  
 尸祝奉邑獨建於北郭之外龍山之顛由來已久左則山  
 勢逶迤右則川原繚繞俯瞰城中萬家烟火既庶且蕃巍  
 然一大都會也相傳神姓高字如山宋淳熙間作宰斯土  
 嘗救災恤患減壽求霖邑人戴之如父母至今以重九誕  
 辰演戲慶祝示不忘也夫能捍大災禦大患歿而為神理  
 固不爽宜乎廟食千古俎豆維馨無如歷年既久風雨飄  
 搖廟貌漸就剝蝕傾圮丁丑之春邑紳士憬然動念有志  
 新之請於姪前縣製簿勸捐綴以弁語并捐廉以倡同僚  
 亦各分俸於是十二鄉之勇於好義者爭先解囊惟歸德  
 一鄉不與焉鳩工庀材不較寒暑舊者撤而新之湫隘者  
 擴而廣之頭門內添設牌亭神馬大殿前構巍坊傑閣迴  
 櫺甬道堅而且固升十二鄉社令於殿之兩廡祀享攸宜  
 塑十二曹地獄變相於兩廊用示彰瘅殿後寢室及僧寮  
 並左側彌勒堂觀音閣悉皆鼎新右建廡屋七間周圍厚

其牆垣各處墁以磚石廟後又買隙地栽松以為護蔭一  
 切規模視昔宏敞其儀門戲臺捐自甘姓官廳於四紳  
 今仍後裔重修是役共費金錢數千百有奇經始於丁丑  
 初秋落成於戊寅嘉平甫歲半已丹堊輝煌煥然一新余  
 於去秋權築新吳每於朔望展禮後目擊董事諸君經營  
 督造夙夜勤勞始嘆奉神之奉神也必誠必敬從此神靈  
 默佑歲稔人和食報正未有艾茲當眾善信書丹丐余一  
 言勒之貞珉故樂叙其顛末如此是為記 按城隍之名  
 見於易古禮百神之祀無其文六朝至唐始祀於吳越宋  
 則遍天下矣陸稼書云春秋祀於壇朔望於廟倘亦於此  
 於彼之意歟 又按康熙間志本縣舊係土城萬歷九年  
 創修磚城遂將迤北城垣移狹三百餘步廟乃居城外  
 乾隆五十年州同廖廉捐送建康鄉燕子窩等處早晚田  
 租十七石三斗嘉慶三年廩生廖為淞貢生為楸生員為  
 榘承父監生謨遺命捐送奉新鄉大坊圍田租六石封職

廖桐川捐送同安鄉田租十六石 以上皆歸廟為經費

火神廟在昭德觀右知縣婁起銓倡建一在駐防廳左把  
總黃迪外委陳榮倡建

龍王廟在南門馮川橋北

公儀

附

三大節慶賀順治間定凡元旦冬至

萬壽節文武官員俱於前一日朝服習儀至本日厥明至

上諭亭立通贊唱鳴鼓五通鼓畢通贊唱糾儀官進文武官進俱  
以次進至丹陛下通贊唱糾儀官站班衆官排班齊通  
贊唱跪叩興文武分東西俱行三跪九叩頭禮興散班旁  
立俟糾儀官行禮畢退

開讀儀順治十一年定開讀儀注凡遇

詔書至文武官員具龍亭彩輿儀仗鼓樂出郭迎接齋詔生下

馬捧置龍亭中南向齋生立於亭東文武官具朝服北向  
行三跪九叩頭禮鼓樂前導齋生上馬隨龍亭後行至

上諭亭門下文武分東西俯伏候龍亭至庭中衆官以次入序立

齋生立龍亭之東西向贊禮生贊排班樂作行三跪九叩  
頭禮齋生捧授宣讀生跪受詣開讀案前宣讀衆官皆跪  
聽宣讀畢宣讀生捧授齋生捧置龍亭中衆官行三跪九  
叩頭禮畢皆退送齋生回原接所膳黃頒行

經過迎送儀順治十一年定凡

詔書經過地方官員軍民人等俱跪路旁候過方起康熙二年  
定凡

許迎送

講約順治十六年議准譯書六諭令縣舉行鄉約責成鄉  
約人等每月朔望日聚集公所宣講康熙九年頒

上諭十六條十八年准浙江巡撫所輯十六條直解照依鄉約全  
書刊刻各款雍正二年

御製

聖諭廣訓萬言頒發通行講讀

譯書六諭孝順父母恭敬長上和睦鄉里教訓子孫各安  
生理無作非爲

頒行十六條一曰敦孝弟以重人倫二曰篤宗族以昭雍  
睦三曰和鄉黨以息爭訟四曰重農桑以足衣食五曰尚  
節儉以惜財用六曰隆學校以端士習七曰黜異端以崇  
正學八曰講法律以儆愚頑九曰明禮讓以厚風俗十曰  
務本業以定民志十一曰訓子弟以禁非爲十二曰息誣  
告以全良善十三曰誠窩逃以免株連十四曰完錢糧以  
息催科十五曰聯保甲以弭盜賊十六曰解讐忿以重身  
命

講約儀注凡朔望日各官及鄉紳士民齊集至

上諭亭庭中設

上諭龍牌南向設講案北向衆官及鄉紳排班行三跪九叩頭禮畢贊禮生贊分班聽講衆官及鄉紳俱分東西席地坐聽士民在階陞立聽贊禮生唱鄉約登壇唱十六條目畢又擇生員宣講各條演義講畢退其各鄉各村或遣教官親往集講或該鄉紳矜里老隨時宣講如式舉行

迎春儀每歲迎春於東郊出土牛先期塑造春牛芒神前一日各官常服用鼓吹彩亭迎至縣門外土牛南向芒神在東西向立春日早陳設香燭酒果各官具朝服贊禮生

贊排班贊跪叩興各官行一跪三叩頭禮興贊禮生贊跪贊奠酒領班官奠酒三爵唱讀祝文讀畢贊跪叩興各官行一跪三叩頭禮興昇土牛芒神行香亭鼓樂前導各官朝服隨後至東郊各官執綵仗環立土牛兩旁贊禮生贊擊鼓樂工播鼓贊鞭春各官環擊土牛三禮畢各退

日月食救護儀順治元年定日食各官俱於本衙門救護二年定月食各官俱於本衙門救護雍正四年定凡遇日食各官俱集縣堂設香案於露臺上設金鼓於儀門內兩傍設鼓樂於露臺下設各官拜位於露臺上俱向日陰陽生報日初虧贊禮生贊排班各官俱服朝服序立贊引生

贊進跪叩興樂作各官行三跪九叩頭禮畢樂止班首官  
上香畢贊禮生贊跪各官俱跪班首擊鼓三聲衆鼓齊鳴  
班首官再上香畢衆官俱暫起立以後報食甚報生光上  
香行禮並同陰陽生報復圓鼓聲止贊禮生贊跪叩興各  
官又行三跪九叩頭禮樂作禮畢退其月食救護儀同

乾隆四十七年奉

旨救護日月食俱改用素服行禮

鄉飲酒禮順治初舉行鄉飲酒禮設賓僎介主酒席凡以  
申明

朝廷之法敦敘長幼之節遂爲定制雍正元年

諭鄉飲酒禮乃敬老尊賢之古制近聞年久視爲具文所備筵宴

亦甚不堪應加敬舉行

賓主陳設主知縣如無正官以佐貳官代位於東南大賓  
以致仕官爲之位於西北僎賓擇鄉里年高有德之人位  
於東北介以次長位於西南三賓以賓之次者爲之位於  
賓主介僎之後除賓僎外衆賓序齒列坐其餘屬則序爵  
司正以教職爲之主揚解以罰贊禮者以老成生員爲之  
律令凡鄉飲酒禮序長幼論賢良別奸頑其坐席間高年  
有德者居上高年淳篤者並之以次序齒而列其有違條  
犯法者不許干與良善之席違者罪以違制敢有誼譁失  
禮者揚解者以禮責之

鄉飲酒儀注順治二年定每歲正月十五日十月初一日於儒學行鄉飲酒禮前一日執事者於儒學之講堂依圖陳設坐次司正率執事習禮至日黎明執事者宰牲具饌主人及僚屬司正先詣學遣人速賓僕以下比至執事者先報曰賓至主人率僚屬出迎於庠門之外揖入主居東賓居西三讓三揖而後升堂東西相向立贊兩拜賓坐執事者又報曰僕至主人又率僚屬出迎揖讓升堂拜坐如前儀賓僕介至既就位執事者唱司正揚觶執事者引司正由西階升詣堂中北向立執事者唱賓僕以下皆立唱揖司正揖賓僕以下皆揖執事者以觶酌酒授司正司正

舉觶曰恭惟

朝廷率由舊章敦崇禮教舉行鄉飲非爲酒食凡我長幼各相勸勉爲臣盡忠爲子盡孝長幼有序兄友弟恭內睦宗族外和鄉黨無或廢墜以忝所生讀畢執事者唱司正飲酒飲畢以觶授執事執事者唱揖司正揖賓僕以下皆揖司正復位賓僕以下皆坐唱講讀律令執事者舉律令案於堂中贊禮生引讀律令者詣案前北向立唱賓僕以下皆立行揖禮如前讀畢復位執事者唱供饌案執事者舉饌案至賓前次僕次介次主三賓以下各以次舉訖執事者唱獻賓主起席北向立執事者酌酒以授主主受爵詣

賓前置於席稍退贊兩拜賓答拜訖執事者又酌酒以授  
主主受爵詣僕前置於席交拜如前儀畢主退復位執事  
者唱賓酬酒賓起僕從之執事者酌酒授賓賓受爵詣主  
前置於席稍退贊兩拜賓僕主交拜畢各就位坐執事者  
分左右立介三賓衆賓以下以次酌酒於席訖執事者唱  
飲酒或三行或五行供湯又唱斟酒飲酒供湯三品畢執  
事者唱徹饌候徹饌案訖唱賓僕以下皆行禮僕主僚屬  
居東賓介三賓衆賓居西贊兩拜訖唱送賓以次下堂分  
東西行仍三揖出庠門而退

耕藉儀雍正四年定每歲季春吉亥印官率所屬耆老農  
夫照九卿耕藉例行九推之禮雍正二年奏定頒發耕藉  
所歌三十六禾詞一章五年定耕藉儀注每歲耕藉之日  
祭

先農壇禮畢各官俱更蟒袍補服正印官秉耒佐貳執青  
箱播種耕時用耆老一人牽牛農夫二人扶犁引各官至  
耕藉位南向立贊禮生贊進耒耜正印官右手秉耜贊進  
鞭正印官左手持鞭行耕藉禮九推九返農夫終畝耕畢  
各率耆老農夫行望

闕三跪九叩頭禮畢退其農具用赤色牛用黑色箱用青色  
所盛籽種悉從各處土宜

耕藉三十六禾詞光華日月開青陽房星晨正呈農祥帝  
念民依重耕桑肇新千藉考典章吉蠲元辰時日良蒼龍  
鑿輅臨天闔青壇峙立西南方犧牲簠簋升芬芳皇心祇  
敬天容莊黃幕致禮虔誠將禮成移蹕天田旁土膏沃若  
春洋洋黛犁行地牛服韁司農種稷盛青箱洪縻在手絲  
鞭揚率先稼穡爲民倡三推一撥制有常五推九推數遞  
詳王公卿尹咸贊襄甸人千耦列雁行耨鋤旣畢恩澤滂  
自天集福多豐穰來牟蕎蕎森紫芒華薊赤甲秬稗秠秬  
秠三種黎白黃稷粟堅好碩且香糜芑大穗盈尺長五菽  
五豆充隴塲稼染縻繫九色糧蜀秫玉黍兼東廩烏禾同

收除童梁雙歧合穎遍理疆千箱萬斛收神倉四時順序  
百穀昌八區九有富蓋藏歡騰億兆感聖皇

早雩儀乾隆七年定每歲遇有亢旱恭行旱雩之禮各官  
齋戒禁止屠宰初次在 神祇壇祈禱陳設鼓樂其祭品  
及祀儀俱照每歲致祭 神祇壇之例自此七日如仍未  
獲雨再於 社稷壇祈禱陳設鼓樂其祭品及祀儀俱照  
每歲致祭 社稷壇之例雨降行報祭禮儀同

崇祭儀乾隆七年定每歲遇有霪潦爲災恭行崇祭之禮  
各官擇日齋戒禁止屠宰用午時於南門水集最湧之處  
南向設城門神位望祭其陳設不用牲帛惟陳酒脯籩豆



之屬儀用小祀祭畢聚衆擊鼓凡三百三十爲一通連擊數十通而退此後每日擊鼓如數至七日未晴仍致祭如前俟晴行報祭禮儀同

祝文乾隆九年頒行

文曰詔命臨民職守斯土惟兆人之攸賴並藉神功冀四序之常調羣蒙

福蔭必使雨暘應候爰占物阜而民安庶其寒燠咸宜共慶時和而歲稔仰靈樞之默運聿集嘉祥襄元化以流行俾無災害

附邑令之任儀邑令之任其前一日齋戒宿於縣之

城隍廟至本日黎明時陳設牲醴等物祭告於

城隍之神行二跪六叩頭禮初獻讀誓文舉行一跪三叩

頭禮亞獻終獻如前儀畢又行二跪六叩頭禮與焚誓文

畢至縣署堂上設香案於露臺東北向具朝服謝

恩行三跪九叩頭禮與換服入署內安香火司命畢出堂行拜

印禮九叩興入座諭僚屬受參見署文案發放畢退至三

日後行香巡城視學查倉庫禁獄諸務以次舉行

朔望儀每月朔望日黎明各官詣

文廟

關帝廟上香行三跪九叩頭禮畢次詣

城隍廟上香行二跪六叩頭禮畢退

開封印信儀順治初年定凡封印後不理刑名不辦事如

有要緊事仍行辦理凡開封印信日設香案東北向行謝

恩禮三跪九叩頭開印則先行禮而後開用封印則先封固而後行禮

祠廟

東嶽廟在縣治東門外道光三年監生鄧祖昕之祖母鄧涂氏重修父華齡母陳氏捐租二十石以爲香燈之資

忠烈祠舊志云在縣治東門外祀明副使周憲吳一貫以舍人周幹及陣亡義士何冲霄配祠久廢今合祀九賢書

院支大綸忠烈祠記武宗蒞位四年江右大饑問左作亂奉新巨盜據華林寨聚衆數萬人流劫奉靖寧武等州

縣遠近響應者以數十羣時周公憲以臬使備兵西道親督民兵討之平其三寨至靖安遇害公有子幹聞公遭難

卽身先士卒赴之亦遇害事聞贈公節愍子爲孝烈立祠祀於邑之東時議以憲副吳公一貫先後在西道築城堡

捍禦矢力盡瘁死於王事遂以並祀學憲李夢陽嘗記其事祠故卑陋且歲久圯甚支子至伏謁祠下竊高二公之

忠孝大節而悲廟祀之弗稱也捐俸新之既竣工爲之記其歲月云我皇祖天造崇尚節義旌余闕以顯忠貶危素

以緇邪風厲漸摩至建文靖難之變死者駢首雖遠師生夷九族而不悔不阻視死如飴然亦太甚矣馴至宣英汪直則媚王振則媚呼父呼師了無慚色土木之變死節者猶晨星迨孝廟寬仁恭儉尚直言崇正學十七年間所以維植元氣良厚故正德初亂政百出而人心不移下逮遼方僻壤卑官冷秩皆知自樹流賊蠶起而許樂陵抗於北周節愍抗於南秉完節以報朝廷則孝廟培養之貽也自後一挫於逆瑾再斲於江彬三木楚辱死徙紛如一時士君子奮激就戮有東漢之禍而直節亦因以衰矣世宗初年直言復振雖貴溪分宜陽激陰排言者不替張江陵乘摧沮之後乾子門生且遍中外奪情則舉朝頌功德卧病則舉朝勤醮禱奉母入朝而傾城迎餞甚於乘輿則天理人心幾於滅絕而廉恥不復在天地間矣是可忍也孰不可忍儻二公者居斯世見斯人其不以擊賊之及擊之耶余故有感於世道而重爲二公述也

藥王廟在縣治東門內

靈官祠在縣治儀門外之左

漢吳二帝廟在縣治南三百步祀漢昭烈帝吳大帝時孫氏據吳併有豫章昭烈以荊州牧過新吳有德於民故並祀之

葆光廟在縣治西二百步祀晉劉真君護法神兄弟四人

俱爲神宋隆興二年敕賜廟額封神爲忠惠英惠壯惠烈

惠侯楊振文記

楊振文葆光廟記紹興三十一年三月十九日廬陵楊振文被命來宰新吳始至三日

凡封境之內山川之神庇賦於人者莫不伏謁致敬於祠下惟爾神之居崇立於市規模雖偉像設於堂四焉疑無專位者呼諸父老考圖經而問之因得神事蹟甚詳蓋兩晉昭德觀劉真君承事護法神也自真君仙去之後見弟四人俱血食於此歷年久矣建炎間金人犯境一邑震恐神於是時見像江北威勇統兵甲如上将虜敵疑懼不敢入邑人安之每歲有水旱疫癘之變無禱不應上下敬事四時未嘗少懈福及於民信有功矣惟祠額久而未有

建立前後長此邑者豈無一人力能聞於上更相因仍而未果者何也既而究之乃不足怪蓋鬼神之事昧而難明歲月之深舉而莫信非因其時而成其事則弗克濟矣辛巳歲金人敗盟復侵淮甸天子有命遣使遍名山大川致禱於神令有司具英靈效順者以聞悉封爵加秩新吳之人因是遂舉神建炎却敵之功請於余余久有意而未有所發是夕感乎精神形於夢寐及旦以其事聞於府自府奏於朝更閱二年再四而後從其請嗚呼何其難哉而況與利除害立事建功注措施為有大於此者不又難哉以余請之之難有以知前人因仍不舉者是亦難也此豈不係於時乎歲次甲申十一月十四日邑人喜詔命之下迎送於祠庭欲刻於石而光大之并索余記之以廣其意余以謂榮光之號非有道者莫能當信乎真君之神不妄矣隆興二年閏十一月十五日記 按葆光廟額今為四惠祠

三將軍廟在縣治北門內通濟橋西邑人鄒軻仕蜀祈神而應歸猶祀之宋建炎三年金人入寇至南津神著靈異金人懼乃引去邑左朝散郎王從言狀聞於朝祀之

天地二仙廟在縣治北錦繡街祀黃四郎五郎兄弟一在從善鄉耕溪

三公祠在縣署後祀涂七公熊公冷公縣署為三公舊址故立祠祀之

涂七公廟在縣市下坊大街之南遷縣時患民無水公鑿井象七星民立祠祀之祠前一井水尤甘

按舊志七公即文師蓋永淳二年

年請置縣後二十三年為神龍二年自故縣徙今治所公墳應尚在也

岳鄂王廟在北門七靖元官之右宋李成寇洪州王迎於邑樓子庄破之民感其德故祀祠久廢

國朝康熙庚午知縣王景賢重建乾隆二年知縣趙知希倡

修嘉慶十年邑人岳廷堅捐貲重建中前兩重並捐田租

三十石為歲修香火費教諭郭大經建修岳忠武王廟記

鄂王之忠而斥檜高之奸恨不牛當其時正王之功以昭其冤殛檜之首以啗其肉也王誠爭光日月而血食無窮者乎後計借過錢塘拜王祠墓且墓木南拱低徊留之不忍去間走大梁便道湯陰王廟在焉過汴京至朱仙鎮展謁王廟廟前鑄跪像三軀臚項半缺盡士人告余此檜與妻并万俟卨為往來瓦礫所擊也心竊為之快然猶恨宋史特書崖畧無由討論忠烈顯末也適承乏新吳鐸與王裔孫省堂先生晉接出家梓金陀編授余因併討論王生平忠孝嚴伐然後知精誠貫日月忠義通神明良平隋賈不如其文韓彭絳灌如其武子儀之恢復孔明之鞠躬盡瘁後先輝映其歷載諸名賢鉅鄉傳贊中者已足觀王顯末矣余不支愧無能贊一詞然竊考紹興元年李成馬進犯洪州王從生米渡擊進合戰筠州復引軍與成合戰樓子庄殺進邑之人賴其捍禦廟祀於城北久矣

國朝趙明府太音捐廉重建久就傾圮迨後趙益堂明府志在鼎新未獲如願今省堂先生偕弟蘭階仍廟舊址撤建

寢室四楹復拓廟前遺地十之八九中建大殿四楹翼以左右兩廂前建大門四楹外豎門樓一座繚以周垣肖像其中旁列部將以配并祀先代於寢室且為歲修香火計捐腴產若干畝美善備矣夫省堂兄弟之果於好義也曩嘗捐學產構試院棚且叛建文昌宮於郡庠上受

朝廷旌今復惓惓於是其好義為奚若哉或謂省堂兄弟係王苗裔以雲初水木之思妥祖宗忠烈之靈其義屬私余謂不然當樓子庄之戰邑方危如累卵非王捍禦而生全之且不且邱墟我室盧蹂躪我骨月也哉是王逆績邑人祖禱於天昔之所治一人今不知幾千萬人矣昔之所全一戶今不知幾千百戶矣故謂王為岳氏之祖王祇屬子孫肇開之宗謂王為保護一邑祖禱之祖王又屬一邑祖禱再造之大宗謂王為保護一邑祖禱之祖王又屬一邑祖禱矣以余所足跡在錢塘者為所葬之地在湯陰者為所產之鄉在朱仙鎮者為所建功之區其他劇邑通都荒陬僻壤廟貌而崇祀者難以更僕數蓋王之心如日月之麗天茲特容光之照爾王之澤如江河之行地茲特始泉之達爾則以今日省堂兄弟不忘其祖之心通諸邑人各不忘其祖因不忘乎保護其祖之心王之靈不專陟降在是而邑人之心儼若陟降在是者於以知忠義之在人心達天

地亘古今自有不容泯滅者當日檜高朋奸寃死王獄祇  
自增千百世之罪案究何損王之精忠烈節也哉茲經始  
於乙丑仲春越明年丙寅工竣并捐租三十石並勒於碑  
陰以垂不朽云

劉樞密祠在寶雲寺後祀宋知隆興府劉琪以奏蠲同安

進城新興三鄉浮產之稅故祀之知縣楊萬里記并名其

堂曰懷種楊萬里懷種堂記乾道四年樞密劉公既登用

孤忠崇崛不少斷利疾視變邪畢力擊排既牢不可動則

嘆曰道行則吾止道止則吾行是不可並乃以大資政作

藩隆興至則旁搜民瘼孰爲疽根弗彌弗媾我則滌除俾

罔後災首得奉新三鄉寓稅之弊欣然上聞其明年特下

轉運悉蠲除之爲錢三十五萬有奇爲米若干爲帛若干

命下而公已遷荆州牧矣於是三鄉昔無田而有稅者今

無其所有昔有鄉而無民者今有其所無又明年五月予

來合奉新三鄉之民相率作堂畫公像於其間以致瞻拜

之敬十一月某日堂成予移官成均將行邑之士民來請

名且記予不得辭名堂以懷種種言德懷言民也於是民

皆嘆曰微公之恩吾其不守址矣予曰此非公之恩也於

是民不悅予重告曰爾不見前之君子乎聞典民之害則

勇於敢聞除民之害則勇於不敢今公之言朝奏而上之

命夕應然則此非公之恩也上之恩也於是民始悅予曰

亦公之恩也於是民皆大惑予又重告曰爾不見世之君

子乎一言而爲民百世之害也彼不曰害民也曰利國也

國可利也民可害也不可害也而觀民有其害而國不有  
其利歟然其人猶矜曰吾知忠於國也且夫國之所立其  
所恃者誰也日夜搖其所恃以忠其主是忠不忠也一言  
而除百世之害如公者有不有也然則此又公之恩也於  
是民始大悅三鄉曰進城曰新安曰法城按三鄉楊記  
與舊志不同記出當時宜得其實

張尚書祠在懷種堂右宋慶元中張杓帥江西奏蠲營田

新稅民賴以全感念繪像與劉琪同祀楊萬里張尚書祠

袁去非將仕郎曾商英移書合辭來請於余曰先生宰新

吳日太師樞密武夸劉公嘗請於朝爲民除僞田之害邑

人德之作懷種堂祀之先生記之矣今又有可記者蓋自  
紹興經界旣行民田旣正惟是田之在官其名曰營者皆

地之幽遐疇之汙萊民之荒棄者也於是官計其民強而授之曰惟種惟糧於我乎取惟犢惟耒於我乎貸惟徭惟役於爾乎復厥田畝賦斗米有半厥土畝賦泉六十民咸利其薄征始競耕焉其後議臣建白鬻之於是民之佃此田者以錢酬官以田業已不省其害也吏言於官曰新田之賦不當夸於民田之賦於是兩賦二役繭絲預買爲粟爲帛舉重其值易而爲泉民之輸者視舊其費十百始不堪命民訴之邑邑謁之州州誣之大府大府曰不可今明府張公瑄未及下車究知民之甚病在此力謁之州州不可其請益堅於是公孤憤不勝欲解印綬對縣門去模三人舉幡倡邑民遮留曰民雖病勿失賢宰今請不可安知後終不可也後必有賢帥與宰意合則必可矣未幾龍圖尚書廣漢張公來帥豫章公欣然曰吾幾妄去今謁不行則去不妄矣即重謁之於公公欣然行之吏猶爭曰不可公勿聽於是田無故新均曰民田賦無抑配均曰賦然後新田之民爲戶一千有九十蹙者舒凋者蕪疾者除舉以首加額而相賀曰微吾宰張君不能爭吾民難爭之賦徵吾帥不能從吾宰難從之請是不可不大書特書以侈張公莫厚之惠以慰吾民無窮之思願先生記焉模三人者當與邑之民繪公之像與劉公同堂尸而祝之前劉後張

文武忠孝則人相若師長慈惠則政相若剗瘼病苦則事相若兩公並立二碑對峙式永厥垂其不淵曜先生雖欲辭將何辭余謝曰其何敢辭或曰兩公除民之害則同然而孰難余曰劉公易也張公則難耳且事有欲爲而不得爲有得爲而不欲爲不得爲者在上我欲爲之我能言之爾行與否在我乎故曰難劉公是也今張公行之自我不行亦自我上無尼旁無牽顧我不欲爾我欲爲之何難焉曰惟其得爲亦不得爲是以難爲何也以新田用舊賦捐州家十百之利其細置官其大匱國何謂不難或曰張公亦非難也留此以遺張公者則難也并書其說以答三公云張公名杓字定叟忠獻魏公之季子慶元戊午人日中大火煥章閣待制楊萬里并書承議郎添差權通判江州軍事兼勸農營田事陳邕篆額奉議郎知隆興府奉新縣主管營田公事賜緋魚袋張瑄立石

沈令尹祠舊在學宮祀沈雲舉後遷於高令尹祠

高令尹祠在北門外登高山前祀令尹高南壽南壽禱旱未雨有願減十年壽乞爲三日霖之祝朱熹守南康歎曰

使吾屬皆如高令尹吾何憂乎民賴以全活者甚眾為之立祠今廢址存余紹祖高令尹祠記淳熙七年江西自三月不雨至六月農告病福清高公宰奉新惕然警懼憂見於色命道流醮天百神以責已詞告帝有願減十年壽乞為三日霖之語雨雖小應旋亦復止如焚如掠滿目空然越明年二月公不自安走白於連帥帥曰所憂者他邑君邑此無問白於漕漕如帥言歸邑悚然若以思食寢靡遑凡救荒術毫舉而縷計之政既成無飢孺無流民挽回凶年已成樂歲頓息愁歎均為歡聲邑之士民緇褐相與留公像於縣驛之東公禁之不許邑人余紹祖言於公曰刑罰刻峻可以脅民公未嘗用嚴機械百數可以籠民公未嘗用智必有犁然當其心而不可遏者毋重違民也七月二十日甲午遂立祠翌日眾以記請余曰記之無媿其何辭焉縣有河分東西豪商富民漁獲獵取米舟順流而下甲往乙繼漏竭乃止於是有運米下河之禁縣為鄉十一土薄賦重民鮮儲蓄昔之饒今已窶按籍而稽名在而實已亡故富者諱其有而不以貧貧者坐待斃而無以告於是出穀賑糶之令勸諭以盡其實斟酌以盡其等如燭之照無能或隱得穀以石計者十一萬餘

令均散收價之半斯民始有生意復約束保伍禁嚴盜賊四方遊手就食閭里晏然於是有安輯遠人之政食足民安孝心油然而修德之胡建康之涂封股以活怙恃縱名教不予亦以見荒政之效公之學問文章素絲之譽飲冰之操以至其他政事俱不暇記止於救荒而民所以祠之者昔晉饑公問於箕鄭曰救荒何以對曰信柳子非之曰人之困在朝夕之內而信之行歲月之外有激則可救荒之術則未盡乎愚曰柳子之言辯則辯矣所以培擊箕鄭似有未當也金石豚魚信猶可及救饑實大事能以信何所不濟高公救荒固多節目大概素有以信乎民而民信乎令行而平事成而懷風行草偃理所必致箕鄭之言未可非也公名南壽字景仁

胡氏祠在儒學西祀光祿寺丞胡仲容都官胡克順尚書

胡直孺後知縣李兼增祀監簿胡仲堯元季燬

趙把總祠在縣治右華豐樓今廢趙把總逸其名元至正

十三年秋賊萬餘自武寧靖安至行都元帥遣把總領兵



百餘迎擊敗之賊退把總以中流矢死民哀而祀之  
馮令尹祠在南門外明知縣馮燧建學養橋愛民禮士數  
年中興利除弊民銜德祀之

李公祠在縣治東二百步祀明知縣李允佐

李司李祠在縣治東南百步祀署縣事本府推官李嗣京

嗣京力為本邑請蠲南糧民戴德祀之

邑貢生彭宏謨李公仁政祠碑記李

少文公祖為豫章司理者七年采賑十三郡風俗鑄刑等孔子之懼書南州理政其燦如也造士起韓文之代衰澹臺友教其我師也所至若甘棠之憩所去動何武之思輿人誦之無思不服今公行敝邑之人思之如思召何然相告作公像祠之碑以記之志思也敝邑士大夫贊而恬其盡民憑而舞其疇民以田賦為徇其頑民以珥筆為舉公至邑首殛諸蠹以靖民懷生矣詳革派馬以息民民利用矣民苦漕公酌以官運無復如往者代蠹償之累且多

方請永改南折而民可藉手以為後圖美哉公如基之矣  
邑城惡易潰乘墉者不必門焉公謀崇墉城成而民有守  
心此數十世之利也凡麗於五聽者不以終訟為能歸而  
號理署為西江道院公一切用生法以生敝邑之罷民敝  
邑人謂公實生我無以異於生十三郡之人十三郡人謂  
公實生我有如敝邑而敝邑其必先者邑人相慶如他日  
云誰之思思公於異日是祠非直寄耳公之功德將在天  
下道路碑曰太史書勳固無以像為也唯是邑人過而拜  
公堂下者因像相觀父母子民之心油然而生像亦不為  
無勸張益州不能禁蜀人之留像公其能禁奉新人不為  
益州耶夫公即三辭而庶民子來不日成之畏壘歌舞吾  
儕得衣食於人倫之世在此堂也彼聖人以天自處自敘  
夾谷之績以為春秋大書者不聞自嫌而公何必以是祠  
嫌耶乃卜地於邑之都會一為像堂敞而不室示不容實  
二為儀門高如堂三為大門題以石廣長計二十餘丈騎  
圍如墉以垂永賴名曰司李總業從民思也土木之功不  
斂而輻輳連成非擾民也既落成伐石以志其事邑有社  
稷將於此問民隱焉非直寄焉而已今地方可憂方大公  
入而政將及於以祥刑天下奉新之人其思也夫公諱嗣  
宗號嘉錫直隸興化縣人登崇禎戊辰進士

東甌胡公祠在縣治北祀知縣胡以溫額其亭曰懷德元黎  
 寬懷德亭碑記懷德亭者新吳人士所以為不設於父母  
 胡侯而壽之貞珉留其遺愛者也夫非詩人棠樹哀衣之  
 志乎然事已履歷焉已侯起進士擅文章歌詩暨古篆籀  
 在干佛名經中猶應得頂生號而何至下伍曾等比成乎  
 其為人侯謁選天官署以推擇可劇令筮得撫之樂攝綬  
 懷繻而至於此中更變故就調新吳成乎其為官侯治凡  
 縣之事亦唯是豈以強教弟以悅安大意既得非肩肩孰  
 何也而士習高曾農服先疇澤鴻無哀廐馬不害百年之  
 仁草於且晚成乎其為政矣此三成者絲其前二亦常事  
 也而今日特為非常繇其後一非常事也而侯又以為常  
 常與非常此乃侯之所以為不可忘雖然又有其大者矣  
 新吳故嚴邑而居豫章西自昔華林諸寨賊新吳未嘗不  
 受創也比元二以來絕秦詛楚翻其反而攻將軍坐分寧  
 祖左則誅其右祖右則誅其左各為填壓實蘭離之當此  
 之時賴有公在新吳又未嘗受創也迺已丑夏四月刀獲  
 纔離紅巾遂起安邑持名號慧竟指新吳殆哉岌岌侯震  
 號未聞鳴琴不輟第一上祕計幕府捲甲疾趨罪人立得  
 聞里晏然此視被賊之毒又不啻相千萬然後乃思指揮

蕭曹折衝樽俎如侯者何可易幾也於是趙子儼然曰知  
 言哉知言哉此作亭北關之本旨也夫火燎於原先者酷  
 矣北關近賦似之火發於薪積者烈矣趙族聚於北關似  
 之今一免酷烈而獲安全侯之錫我又多乎哉黎子曰不  
 然佛有于子者而無不慈也而于子者各以為其母之慈  
 之也頌詞猶是也趙子終言子之情黎子終言父母之德  
 而已黎子無宿昔於侯獨伏草莽間久稔行道語若讒識  
 知美人所在而其記諸簡則因趙子之請趙子不習黎子  
 又因趙子之弟習黎子之弟而以請若此者非云暱也黎  
 子且病必勉而記以文且不文必不諱而不記以文存民  
 生之直道借神聽以和平若此者非云諛也倘亦竊附於  
 公乎然而黎子又私之矣人各有情火宅之子觸熱思涼  
 思而不遂其將於趙乎如如無益也其將於侯乎如如夫以  
 侯之賢繫乎天下必非新吳所獨毗於是即無修籌賊功  
 但治行第一自此升矣頗牧禁中時其無日惟思趙而哀  
 衣既歸棠樹弗翦此日周召非侯而誰式徽旄邱之詩序  
 二南後應無充耳庶幾哉侯將擇賢而用之以安輯新吳  
 之隣而大造黎子之邑也侯名以溫字玉如號東甌上谷  
 人丙戌進士趙子名志祖字啟元大官署丞其弟名民命  
 字元功黎子之弟元宗字宗之壬午科舉人而黎子者他

日當衡事忤權廢今遺民南昌黎元寬也例得並書

董公祠在縣治馮水之南祀知縣董宏毅久廢乾隆四十

六年邑人即其地及皖江陳先生書院廢址建祠合祀二

公及知縣趙知希祠後置店屋三間歲收租賃為香火修

葺之費饒宇拭邑侯董公生祠碑記今為三公祠

皇帝臨天下十有三年中外蒸蒸向化安民缺畝衣食不見兵革比以滇南倡逆據蜀患楚而江南西道近楚粵若袁若吉若新昌分寧靖安山礮合複奸人往來煽動賊蜂起新吳在大江以西治地半崇山賊殺掠擄奪無虛日是時三韓董侯實來令茲土既仁且勇政有次第於是集父老子弟議戰守法井井有條民有固志甲寅十一月新昌賊薄城侯身率守軍戰城西南斬獲無算賊奔散既而精安兵變台賊勢甚張侯約束守要地賊不敢犯侯益捐俸募義勇親授戰法各鄉擇有才畧者為團練長居則各為守出則檄以隨征民氣益厚有隱然定勢乙卯十月賊萬餘踞

獅山瞰城駁石雨下侯親率守兵殲其前鋒賊潰走俘賊甚眾巡憲李公提師進勦侯領義勇導遇賊礮下搗其穴賊積憤思欲一陷城為快丙辰三月數邑賊陰絢環攻侯驟軍門請兵至問所向侯曰賊烏合易耳擊一股可盡散侯以義勇導戰礮山斬級數千俘百餘人諸賊果瓦解自是不敢復肆城賴以全侯為政勿苛勿慢民疾痛咸悉時親王將軍大兵屯會城軍需疊出侯以地方荒殘狀請免新吳上六鄉民走死田荒積逋累侯以丁缺田荒繪圖請諸上憲感動特疏請蠲而十六年以前積欠得悉赦免荒缺亦得減半皆侯賜也丁巳大軍進勦侯領兵民會賊感公威德降其眾數萬赦不治給牛種復業賊平自甲寅來隣封屢攻陷侯獨以孤城三面當賊設奇制勝迄有成功又請蠲請賑復其田廬使無失所功在朝廷德在新民甚大臺使者已上侯治狀方且特召為近臣以酬侯勞而新吳薦紳士民感再造恩謀所以報侯於不朽乃即侯常所講武勸農處構講堂祀侯既落成以書屬不佞記不佞固隣治從口碑知侯甚悉其善政不勝書請記其大者以見侯之功德自在百世新民且將子子孫孫俎豆永遠弗替也豈第甘棠遺愛勿翦勿伐已哉公諱宏毅字士超號任菴三韓人詩曰於惟上天篤生

奉新縣志 卷三 建置一 祠廟

聖后悉臣萬邦為民父母為民父母既生既鞠極熾而豐乃苞  
稂莠遂即我戎抗王之命敢仇我民鼠竊而逞惟我西江  
楚閩門戶風聲振隣山鬼隨附颺颺晝遊棲魂莽棘恣之  
草薶恬嬉鋒鏑曰邑新吳實逼而處岌岌孤城環攻側距  
上天降生

天子有命賜之董侯董侯來合不震不驚既仁且武維侯長城  
維侯干櫓蜂屯芸芸試侯之怒屢瞰我疆百雉屹立守正  
出奇戰則罔失劍吼馬鳴風馳雷疾全侯之封保國之赤  
如出之焚如援之溺新民既安匪民之安侯經營之砥其  
狂瀾人為其易侯為其難侯活新民功高德普上於

天朝執與侯伍

天子是嘉陟為卿士霖雨蒼生沛澤萬里獨此新民實侯所生  
遠彼怙恃有涕其零爰芟其棠爰豎之屋百堵俱興落成  
何速擊鼓闐闐迎侯至止拜侯堂下侯則燕喜曰新之民  
自子而孫又孫而子拜斯祝斯歌斯舞斯如其祖妣巍巍  
者山渟渟者水與侯茲堂綿綿百世百爾有位以侯為式  
以侯為式報我

聖天子

二胡公生祠在從善鄉崇禎末李肅十作亂司李胡時亨

勤平順治間余盈四嘯聚知縣胡以溫捕治民藉以生故

合祀焉

靖源真君行祠在奉新鄉磐溪

順應行祠一在奉新鄉洪塘一在新安鄉龍溪

修德神祠在北鄉雅溪今南北二鄉即古修德鄉也祠仍

為二鄉社

清江祠在奉化鄉甘坊

石賢廟在北門外

三官殿在東門外

舊志遺今

河北廟在北門外

武烈祠在東門外

補

青岡廟在建康鄉青岡山相傳太史慈攻劉磐時過此民

感德祀之

膠東太子廟在建康鄉青湖祀太子劉榮

按漢書榮為景帝太子七年廢

為臨江王坐侵廟墮地自殺葬藍田燕數萬衛土置冢上百姓憐之南方有廟固宜冠以膠東則流傳之誤也

周侯王廟在建康鄉距城十里北洲橋下祀前漢周勃

按

侯未至豫章或鄉人祠祀因灌而及絳侯考

真武廟在建康鄉獨高峯祀真武水旱禱之立應又赤墀

里望樓岡亦有廟

應城隍廟在奉新鄉大源里祀應刺史知項廟距墓十里

舊志宋大中祥符末吳氏子得石劍玉碗於應刺史廟後井中持之以歸變怪百出遂投故處乃已

順應廟在南鄉今名感古祀吳建昌都尉太史慈慈拒劉

表從子磐有功民即墓旁立廟宋隆興元年賜額順應乾

道三年封靈惠侯邑人李琮記

李琮順應廟記赴人之急而能抗辭以興釋圍之師

分人之憂而能督將以拒殘民之寇自非信義著於人智勇冠當時疇能及此哉是宜生則為豪英歿則為神靈廟

庇生民功扶社稷應千萬祀而廟食無窮封爵益崇也祭統所稱以死勤事以勞定國能禦大災能捍大患皆得與

於祭典故后稷勾龍以平水土教稼穡稽得通祀於天下而歷朝將相名臣亦各以其忠烈得血食於所治凡此者皆

以其有功於民故社而稷之尸而祝之後世因其輔國祐民又從而褒寵之所以順民之心以明報神以教事君也

東漢之季盜賊競起民無適歸姦雄豪傑乘時肆志擅甲兵植强大以覬非望者所在如太史公獨以邁往之資

懷忠仗義解紛弭亂志在康時其功勳行事備見於吳史攷其本末可謂信義著於人智勇冠當時而有功於民者

也蓋嘗論之處糾紛之世非文則無以出奇制勝非武則無以摧堅挫銳公在當時雖非突圍挑戰中鵠破的施之

於武然畫謀決策應對周旋蓋亦有文事焉觀其救北海之危而乞師於元德也引義慷慨不過數語而凜凜烈丈

夫之氣備見乎辭非其文能若是乎而本傳所載止稱少而好學其文乃不他見豈公所學皆實用之文而非章句之文故耶惜公以文武全才設施未究天不假年致其功未足以稱其才論終之言自以不及升天子之階為恨其志概可見也公廟食茲土蓋孫仲謀統事之初以公都海昏有功遂悉以南方之事委之故其薨也葬於此而廟食焉然廟之建千載矣其廟號封爵曩皆即其舊而稱之獨未見有以公之遺德餘烈聞於時而蒙寵光者豈潛德發輝固自有待乎聖宋光堯壽聖皇帝在位三十五年金人敗盟侵擾淮甸朝廷方督諸軍遏絕勦除既而百靈助順金即殄滅有詔天下具所在靈應素著以聞將議褒封此邦之人備述公禦災捍患之功敷奏於廷於是順應廟額首頒明年嗣天子以舜紹堯進登大寶邦人因所降赦文又條上公功請列爵故靈惠侯之封復膺其賜命下之日縣官暨井邑笙簫旗鼓迎詒至其本廟望東南虔拜宣布所封已侑神三獻大夫士相與飲福受胙酒半令尹陳君舉觴而言曰廟額封侯無媿矣而事之所遇得不為千載一時乎夫神依人者也千載一遇雖本神之功而兵緝謀經理實二生力焉蓋指琮之子大源與邑人楊闓詩之子曩而言也琮起而言曰公之遺德餘烈凡屬當時所治之

地無不蒙其惠而此邦之人事公彌敬飲食必祭水旱病疫盜賊竊發無不以禱禱則必應琮族居密邇公之祠塲而環廟之山與夫廟地又皆世業故咸公之惠為多在建炎間一新其廟貌至今歷時之久椽腐瓦碎門頽牆圯幸因建侯之封將率諸弟再葺而新之并敘今日所致之由而刻諸石士大夫同辭而贊曰茲盛事也非子其誰宜為琮旣言矣敢不承令公有行廟在邑邑人以每歲端午前期扶老攜幼迎公入行廟留祭五日為遊江樂神之戲節後一日復傾城送還本廟故賜額之敕楊開詩分掌在行廟而本廟在墓地故封侯之誥琮實掌焉昔諸葛孔明之歿也蜀人思之所在崇祀而漢詔獨以廟墓為正故今錄公封侯之誥與公存歿功烈始終之大畧刻石本廟昭示將來庶幾公因其所封而厚其福於輔國祐民則自侯之封等而上之復將有所遇焉乾道三年四月一日戊辰立石令尹陳君右承議郎光祖也胡以溫感古廟詩蕭蕭風雨一龕孤碧篆青燈乍有無衰草長堤多積雪夕陽古樹集惹烏東吳自此誇英烈北海於今仰壯謨誰道此方廢祀事千山如戟寫雄圖舊志載宋嘉定咸淳間神累封福善威顯廣祐靈惠王夫人累封昭懿順惠顯正協祐妃父累封行慶孚祐廣惠統善公母累封嘉德順祐昭懿

慈應夫人子累封靈濟王子婦累封贊慶妃又邑人王珣  
建廟於東門名曰順應行祠今廢

又感古廟二一在新安鄉梅陵園一在雄嶺園

賞兵衙廟在南鄉東站祀漢劉繇

舊志按吳志韋融殺豫章太守朱皓遂據郡中

繇進討融招所屬縣破之里人謂繇於此賞兵保障鄉里或不誣云

卯山五神廟在北鄉祀韓當馬忠黃蓋王平凌統五人宋

咸淳中敕封當忠勇武烈侯忠威肅武安侯蓋英毅武明

侯平廣德武安侯統忠勇武安侯

余侯廟在法城鄉車坪祀梁刺史余孝頃車坪刺史舊里

余姓皆其苗裔廟久廢紹興二年余氏新之清江倅王炎

記元季復燬洪武四年後裔余彥敬彥從重創

王炎余侯廟記新吳

之車坪有廟曰叢祠近道旁其傳曰陳南豫州刺史余侯  
之廟也侯諱孝頃家新吳自梁太清以後主考於上政荒  
於下侯景擁衆跋扈莫能誰何於是中外騷騷而生民戚  
然苦兵當是時侯以英特之姿率其弟孝勵孝猷子公闕  
奮起閭閻南斷章江之浦北控艾山之陽列戰艦築城堡  
外捍寇攘內庇宗族鄉邑使生聚得以自全而無患蓋侯  
之本心如此視世之姦豪伺風塵之警大欲觀鯁小欲割  
據可同日語哉及主僧辨討侯景始提兵爲其聲援遂假  
手豫章僧辨敗高祖乘時移梁鼎璽侯助蕭勃又助王琳  
拳拳之心猶未忍背梁琳敗侯不得已始入陳文帝以爲  
勇且義也使督兵以定東閩既有功擢守南豫跡其崎嶇  
荆棘雖用兵或勝或負卒能使鄉曲之父子兄弟免於屠  
戮則其德誠有不可忘者廢帝初安成王專政侯遂遇害  
鄉族感之迄今踰六百年而廟食不絕水旱疾疫禱焉無  
不響應則侯之精爽凜凜猶未泯也是以春秋祠祀不懈  
而益虔然棟宇卑陋不足稱其休顯紹興辛亥侯遠孫將  
仕卽次臯等乃卜吉撤而新之爲殿閣門廡五十楹富者  
出財壯者出力經始於元年之二月訖工於次年之十月  
以書來屬余記其成炎以史考侯之始終竊有悲焉廢帝  
嗣位安成王屬尊勢逼嫌隙旣生南豫與建業相隔一水

耳王以帝命召侯故侯頌於前而帝廢於後王遂代有神  
器昔翟義敗而新莽代漢母邱儉諸葛誕死而司馬氏代  
魏侯不幸殺身其事亦大類此史氏不知春秋而以臣子  
之罪筆之汗青九原有知侯能無憾於是哉故爲論侯有  
其德其命秩雖未登祀典而禦災捍患於法宜祭又爲辯  
史氏之書未善悲其不幸明其志而雪其冤因繫以詩使  
刻諸麗牲之碑以廣其鄉人祀侯之誠詩曰昔在典午中  
葉南渡天步既艱民亦多阻寓縣劍殘莫固吾國洎諸廢  
梁世滋不康姦宄旁昵迭爲寇攘暨乎余侯膺力方剛手  
提孤劍捍城一方植柵在原列艦於清雄歟勁敵莫敢予  
侮男耕女織閭境安渚叛將跋扈問鼎輕重鈞陳倫輝宗  
社震動侯在下國不難不悚鞠依翰飛獻其忠勇僧辨改  
圖自夷其元陳祖乘之取日虞困專執國柄大命以遷烈  
烈余侯義不忘國且守且戰崎嶇艱棘晚乃入陳志伸力  
屈受命督兵綏完東閩帝曰偉哉女余虎臣剖符植屏天  
塹之津人之甚難鴻毛一死君爾忘身有殉無二旣歿而  
存功名百世廟食鄉社車坪之里誰作新廟侯有孫子新  
廟孔碩侯來燕喜車坪之里新吳之鄉民懷侯德歲時烝  
嘗坎坎伐鼓以迓百祥年穀屢豐抑無疵厲侯德不忘施  
於千世牲醴告虔逾永不替刻石廟門以誌來裔

清源真君廟在法城鄉地名駕山宋咸淳九年里人鄒堦  
以浙西轉運調成都路丞秩滿還里奉真君香火於已地  
立廟祀之神多靈應鄉民祠之廟祀唐隱士鄒垣

國朝乾隆丙午裔孫御史鄒玉藻率合族崇建祠堂

北嶺廟在進城鄉孔源

南嶺廟在進城鄉定興市南嶺神姓名無攷相傳有贊國  
保安興化崇福助國之號

忠惠廟在進城鄉竹埠

華光太子廟在奉化鄉小溪生員蔡佐才捐建後裔重修  
葆光殿在奉化鄉上富



將軍壇在奉新鄉龍規祀太史慈

石公廟在縣市北頭街元至元間主簿石遵古縣尉石巖

有惠政民立廟祀之

藍溪祠在縣治東馬家巷一在南門外圍頭宋隱士王度

號藍溪築室教授後人即其地立祠以上二祠舊志遺今補入

各鄉行祠 附

文昌行祠一在進城鄉羅坊後晉羅金生建嘉慶丙子重

修一在進城鄉竹埠上有閣一在從善鄉洲南合鄉紳士

建捐置田租一百十二石

關帝行祠一在進城鄉羅坊鎮一在竹埠上有閣一在法

城鄉水口居側一在奉化鄉石溪乾隆乙巳廩貢蔡承經

捐建上有 文昌閣

城隍行祠一在奉化鄉獅子山乾隆乙未曾遇春捐建一

在進城鄉定興一在進城鄉東園嘉慶丁丑幸光瑛捐建

一在奉化鄉石溪一在進城鄉羅坊鎮嚴暉吉羅坊城隍廟記去新吳縣治

六十里曰羅坊鎮為巡檢分治地故未嘗有城無城則無  
隍也無城隍則不得有城隍神也然易豕不云乎觀天之  
神道而四時不忒聖人以神道設教而天下服是則神道  
足佐治天下者權之所不及而視都知國視鄉知邑凡有  
功德於民者則祀之禮也亦法也羅鎮之有城隍祠職有  
由耳攷邑志所載康熙十四年春新昌土匪與義寧靖安  
諸匪合掠進奉兩鄉焚劫無虛日賊欲由羅鎮以薄縣城  
竹溪諸生羅光亨等以羅鎮為其祖祠所在扼賊要害與  
本鎮紳士團練鄉勇竭力捍禦賊每夜望見鎮中神燈照  
耀如白晝駭不敢近卒未能東下適觀察李公奉檄調兵

督同邑侯董君進勦賊遂平此則一方保障之明驗也其  
 廟之設則自乾隆乙亥經前攝縣篆臨江通守刁公及少  
 府程君督飭進奉兩鄉修建而規制未擴歷歲久又為風  
 雨剝蝕少府稽君先後治茲土十餘年朔望請祠拈香概  
 然有意修葺會調去未竟厥事至嘉慶己卯秋少府俞君  
 受篆乃合兩鄉人士而計之捐俸以倡樂輸者踴躍得自  
 金千兩有奇於是鳩工庀材且拓地基數弓閱數載而向  
 之頽然者今且巍然矣向之茶然者今且煥然矣而且庖  
 滷有所香火有資其外圍牆有基一切經久之規以次而  
 舉夫非俞君為民祈福之心切而善政感人之深有如  
 之鉅功偉觀也耶夫馭天下者權也威福予奪之謂權人  
 亦神也鬼道顯人道晦識者所憂春秋鄭子產斥神竈之  
 言內史過譏虢公之德實與季良之規隨侯晏嬰之論祝  
 史相發曩者余為豐順令每驗要案必詣城隍祠拈香仿  
 包龍圖之意逢雨暘祈禱輒應是神之在粵也猶其在吾  
 土也今神以彰善瘅惡為權足佐官斯土者所不逮將使  
 人心格風俗美而四序休徵協應秋冬之報賽以時揆之  
 聖天子神道設教錫福同風之旨不適相昭合耶俞少府精吏  
 事為政具有條理惜未匝歲而代而斯役也遂用有成故  
 於其落成而為之記

寺觀

勅建百丈寺在縣西一百三十里唐大厯間邑人甘貞施山建

庵初名鄉導庵後貞延請懷海禪師住持唐宣宗為光王  
 時為武宗所忌多晦迹為方外遊會至此後帝即位勅賜  
 大智壽聖禪寺額南唐時徙寺於西北隨廢宋元豐中復  
 建張無盡為之記洪武中為禪寺叢林

本朝修置不一內極宏敞山門大殿規制頗壯後有凌雲亭

師表閣師表閣三字係明崇禎時樂安王所書康熙間南

昌知府葉舟重建雍正十二年奉

旨勅修內府頌圖改造費帑七千餘金

柳公權百丈寺詩禪地無塵夜焚香話所歸樹搖幽

鳥夢瑩入定禪衣破月斜天半高河下露微翻令嫌月白  
 動即與心違 周惇頤前題詩好風吹上最高臺雨洗青  
 天萬里開落碧半空山鬼泣也噫跨似錫飛來絕頂茅庵  
 老此滄寒雲孤木獨經行世人那得知幽徑遙向高峯禮  
 磬聲浮生不定若蓬飄林下真僧偶見招覺後始知身是  
 夢更甚寒雨滴芭蕉 蔡國珍前題漫遊古寺踏春暉石  
 徑雲深翠作幃似解笑人花疊疊憤能近客鳥飛飛相逢  
 老衲談唐代自愧東坡落箭機兩袖和風桃頰醉聯詩乘  
 真詠而歸 彭良翻前題因尋靈境陟危巔隔絕塵寰別  
 有天無語巖花常灼灼忘機林鳥自翻翻九迴水色侵寒  
 石百丈嵐光帶曉烟憩息尚方懷往事智師唐帝尚依然  
 張致遠前題微官驛我走塵埃每到林前眼豁開蓮社  
 未容書姓字又隨流水出山來 張翼前題野殿山棲夕  
 照孤閣田秋草盡荒蕪當年祇有月明在猶照殘松宿鳥  
 烏 王介慶前題披襟挈伴思消暑知雨聲風話尚方擬  
 枕白雲無處截夷猶偷憩老僧床 傅修頭陀寺詩宿性  
 厭塵囂名山結良契選勝及頭陀來值霜天霽行行一以  
 深亭午轉昏曉劃然復天開宏規啟妙制大哉頭陀師宗  
 風闢外諦至今諸比丘能談其軼事為言百丈山此山之  
 右袂相去百里餘師始實遊憩愛彼峯巒佳因窮開鑿勢

長鏡揮不停及泉奇鬼二堯鑿燦金光驚起時一眺挺戈  
 遂戰師師奔佯誘制一鬼留守山一鬼追彌厲轉鬪溪谷  
 間逐師遁深隧鬼憤不得師自到亦長逝其一留守者不  
 知所終既師從隧中行安然幸無慮俯僂見隙光踰蹙纒  
 一遂從井出高峯即今頭陀寺山寺所由名各實以師係  
 指點何太真倘恍為一噫隧行或出山鬼死誰彼瘞地亦  
 畏宗鋒天不窮禪鏡即持百丈高背以頭陀貫拱衛分層  
 密觴豆不足計團瓢亦百餘隸處如瓜繆我遊僅信宿初  
 未求根柢他年是故人築室申明誓 甘禾前題用昌黎  
 南山詩韻崑崙為地中天水皆在面八柱三千軸廣深難  
 測究名山紛析支一一西坤授四裔表巍峩觀記萬千漏  
 奉新古海昏地鎮廣延觀獅虬形沸鬱萃越勢奔湊石破  
 經鑿鉤峯環儼錯繡屨屨百丈山地隔脈通透萃律露青  
 藍槎枒挺翠茂林際抽高髻雲端呈疊岫或如仰而承或  
 如迴身就或如神龍頭或如怪鳥吻如寶誌錫森如孟宗  
 筍秀如八公鍊丹如五老醉耐夙聞磨嶷躡躡層列寶覆  
 先公之所施土木高低構延彼瀛海居何殊善權瘦五百  
 續禪燈清規垂紫宙迦葉何從龍蓮花真雕鏤天造鏡空  
 明餘青周廣袞棲遲奇懷積奮遊山僧侯大小各呈露遠  
 近爭競筵即景月在臯出門歲常戊累日破天工雄心入

幽竇谷中雲可鋤澗底石堪激况復攜良朋縱譚任駁糅  
 我興忽焉乘登頓勞晴晝行行上下坪峽水漾清瀝幽險  
 怯山精狡捷思林狖卓哉壽聖宮萬古永不仆祇園拓闢  
 然傑閣闢荒陋柳趙筆格精周黃詩文富留名黃鳥呼擁  
 蹕元螭走妙句寫山河大義歸懷宥攢影帝星移鍊心仙  
 籍舊更聞此香城鑿址藉神祐頭陀洩斯言奇鬼或彼詬  
 裘裳避追騎潛身入井瓮沙彌信厥因余嗤何恟愁九曲  
 寺後泉荒涼恐迷舊我往謂僧寮佈置尚可又兀坐聽野  
 猿徐行狎擾吾大雄策杖登御風若仙寇石碑卧草間字  
 缺難補救松古上雲鱗林深長雨敲樵歌時數聞水樂聊  
 一奏星橋伊誰設靈境孰與貿留連到賓峯釋迦思邂逅  
 厯險漫疑眸看瀑時昂脰仙洞何年開入境易昏昏百節  
 仰峻嶒一溪俯津溜島嶼若削成淪漪亦徑復黃夫木人  
 墳兩墳分左右聽經得善識荒語述釋胃更有各雲根萬  
 年不腐臭跌坐彌勒尊偏袒大士副瑰瑤走龜龍墳碎竄  
 颯颯大義宣宗風紅柏巧裂皺體骨競蹴沓勢欲與空鬪  
 日午霍霧生雷鳴雉微雉青峯漸蒙翳白雲看輻輳蘭若  
 任停居蓮宮隨步驟或乞觀音憐或拜仙姑佑五雲若散  
 花雙峯若注灸迴龍看蜿蜒祖塔辨篆籀古基霧迷離西  
 竺星點逗日城能為安霜畦亦易耨自種山蓮豐匪慕泄

杭購振詞遺華菁錯景漸誣戒寶護始終迷途連成劫  
 欲棄禪談筌將刊勸志謬靜中繫捷槌齋時飽釘鉅屋接  
 堯姓居墳埋廿氏樞邈然重水木因之承祭豆華表疑元  
 禽衣冠駭伏獸近庵侶鶴王倚峯思靈鷲嗟余洗苔碑祖  
 蹟誌先後搜異息奔騰賞新更停留恭惟

聖皇朝上下道相媾里巷何熙熙翔皆袞袞叢林掛 瘡懷  
 不獨崇鬱狩神工寶殿開如來今並首一朝地果靈炎興  
 若蒸縮懷棟含雲烟清輝凝不收寺散百頃金橋成半月  
 鼓駕客日晚至深廊秉薪樞撤舊已擴基鼎建實啟絲從  
 事大賢勞匠氏亦夷垢寧須海岳移豈非雲雷邁連費蔽  
 日車高標映斗宿有如藜藿旌亦復類庫廡又如行玉山  
 楹礎沐瑩琇紫霧遶東堂朱霞起西雷衆事金碧誇余情  
 泉石扭置身殊軒軒畜意久懋懋如魚入水鄉厥解固中  
 臆芳屨不無同綠禪豈獨侑但使溽暑消未覺膚革疾躡  
 茲濟勝展棄彼遊仙兕諦觀青鸞麗工力嗟和傲欲歸曷  
 所攜禪雲自摘嗅明日出山行山靈何以酬

大寶勝輪塔院在百丈寺西大雄峯下乃大智禪師宰塔  
 坡也塔殿毀於宋明洪武初興復天順中增修

舊志按百丈僧舍舊

有百餘所今所存者曰雙峯塔寺曰西竺庵曰仙姑庵曰五雲寺曰迴龍庵曰中峯寺曰祝聖寺曰橋背庵曰觀音寺因附錄之

寶雲寺在北門外梁太清元年建舊名信誠寺後馬祖講經於此致紫雲之祥改今名元季燬洪武初僧性空海重建萬厯年間僧智達募化添建不二門於正殿年久復傾

國朝嘉慶己卯僧隆徹與仁募化重建

李平遊寶雲寺詩松陰午吏散夏日何其

長尋雲陟東方幽徑逼禪房老僧入十餘氣爽精力強是非口不道貞妄心兩忘鑿池收野水鋤棘植新篁雨來修竹響風過菱荷香客至何殷勤不斟醴酒嘗旋酌山下泉烹茶煉蕪湯數飲心不醉獨醒過江湘寄語濯纓客不必向滄浪張景修寶雲觀石劍詩翠崖誰鑿莫錮鋒神物移來鎮梵宮恐後延平飛躍去翠藤交幹鎖虬龍

延恩寺在縣治東門內舊名羅漢院燬於元季洪武間僧

崇信崇義等重創嘉靖七年奉文并入寶雲寺八年告復仍今名

國朝雍正十二年重修

三元殿在縣治北門外

準提庵在縣治東門外

雲端院在馮川橋之南前有文昌閣明知縣馮燧建橋成剏院於橋之南以鎮之給租贍僧

中沙庵在馮水之南舊雷壇是也邑人鄧永圻未達時肄業於此後領鄉薦遂擴大之前祀元帝後建佛殿左蔣修竹數畝構亭其下仍出田二十五畝爲贍僧費後始改今

名郭子章中沙庵記新吳縣治之南有與梁循梁而下數  
 武建有庵四周皆茂林修竹鬱鬱蒼蒼可堪寓目左多  
 曠畝右繞清流雉堞如雲里社環集喜林木叢翳蔽其繁  
 杳入其中別一洞天予因王事之粵過新吳夕陽晚映不  
 欲以晉接煩有司遂舍僧房啜茗供麥飯忻然一飽乃  
 進僧而問其建自何氏僧曰此昔宰官鄧公永圻先生筆  
 舌地也朝一范盃暮一韓檠攻苦數年遂爾飛去雋後復  
 理故業遠近受業者戶盈履公置田若干以為贖讀資舍  
 宇精良臺榭都雅植名花百本四方流覽者咸築趨之迨  
 中葉不無廢典數傳有中沙公仕闕夙根大乘護法有方  
 慨然興復召緇流以守之後有演武亭形家所謂武曲也  
 中沙公前祀元帝以鎮地靈後崇佛祖以紹曹溪簾留共  
 然中沙公力也言畢予卧僧初不知予與中沙公有舊議  
 次日戒車就道中沙公偕兒文會持刺來謁歡然道故予  
 詰其址中沙公之言一如僧之言詩曰子孫孫勿替引  
 之中沙公之謂也予頷其額曰中沙庵遂速僧言為之記  
 天姥宮在北門外城隍廟東明崇禎間邑人自西蜀來傳  
 神痘之法效如響應民感神功立宮祀之

國朝順治十八年知縣黃虞再建水心亭於宮前池中有記

今廢址存

惠安寺在縣治西宋祥符間建明洪武初年沈復初重建

嘉靖二年廢移佛像羅漢像於延恩寺

按舊志藝文內有無名氏月夜潛題

惠安寺鐘樓詩云露華清入極吟上小樓東月色水鋪地  
 雁聲秋滿空銀河欲瀉浪瘦竹自生風坐久肌骨冷此懷  
 誰與同今攷宋陳起前賢小集拾遺此詩乃魯交所題為  
 清夜吟特銀河作明河肌骨冷作心骨爽鷓鴣云交字叔  
 達梓州人天聖中虞部員外郎有三江集蓋當時月夜登  
 樓者偶書舊句非為此間作也

竹林院在從善鄉唐光化間建

竹林院大樟樹二扶疎可蔽數畝昔有官新吳者欲

伐之以為材一老僧抱樹而泣願以身代其僇因得免

龍頭山寺在從善鄉

潘美詩天接水中寺水浮天底山松根隨似磴路隙可通關蛟室玲瓏處

朝川無有間英英迴石浪渾是白雲關

永鎮寺在從善鄉舊名龍鳳閣明况鍾易今名并爲之記  
天乙山寺在從善鄉祀真武極靈紅巾賊起司李胡道亨  
禱神而應後賊滅乃錙神威永靖額以表之又傳唐宣宗  
會題句云門前山水丹青譜洞裏乾坤蓬島圖

國朝雍正六年修

余升詩紅塵飛不到禪林偃仰閑房靜且  
深翠篠迎風聲戛玉蒼松映日影篩金鐘  
敲夜月催塵夢鳥噪朝曦報好音最喜雙溪如帶繞潺潺  
日夜自鳴琴

白衣庵在從善鄉鄭洲河北

觀音閣在從善鄉顧溪

祥雲庵在建康鄉三溪

法濟寺在建康鄉橫嶺山

尊勝院在同安鄉宋崇寧間建明崇禎間邑人胡一供修  
剏前殿

幽谷院在同安鄉明洪武間剏

長壽院在同安鄉舊名開山院

寶藏院在同安鄉之黃城宋大中祥符間賜額內有綠篠  
閣名人多題詠

正宗寺在同安鄉

惠明院在同安鄉舊名廣福院元季燬

道濟院在同安鄉

滋福庵在同安鄉

天帝寺在同安鄉

檉榔庵在同安鄉

隆教寺在奉新鄉朱祥符間僧如璉建舊名臨湖院明洪

武二十一年僧會淨住增修二十六年開叢林正統間僧

觀古意復修尋廢宏治間寶蓮院僧智宏智寬重建碑存

按碑載南檉王珣施地九臯王振清重修

國朝康熙五十四年僧波定子皓復建乾隆三十四年鄒樸

裔重修羅漢堂一重嘉慶二十五年僧乘舟建亭

朱雲鳳詩禪關

春盡落花香鳴鳥聲中帶夕陽清景逼人消不得東風沈醉發詩狂胡以温詩出郭來蕭寺偏宜十月秋蒼涼干

樹肅湛淡一時幽乍識僧疑古盤衣坐釋憂會心何必遠指顧絕塵遊

鐘山院在奉新鄉 景泰志作中山

崇法院在奉新鄉

鎮城院在奉新鄉五步城

翠竹寺在奉新鄉明季建後廢重修

臨池院在奉新鄉

白雲寺在虬峯漢建安時建右為禪堂後有觀音閣

國朝乾隆四十三年僧會廣裕偕徒續林募合邑重建

梵安院在南鄉

圓通院在南鄉



水月庵在南鄉隨湖一在石湖

顯教院在北鄉六都卽帥氏龍泉書院地原在哀坊後遷於此

海智院在北鄉

信善院在北鄉

太平寺在北鄉

圓通寺在北鄉蛾眉洲右

龍潭寺在北鄉

迴龍寺在北鄉蛾眉洲左

靈光院在新安鄉唐光化中建一名城光宋治平中改名

龍藏一名白龍宣和御筆賜額

國朝康熙丁酉僧定意重修

舍利院在新安鄉

達觀院在新安鄉

黃龍庵在新安鄉

興慈院在新安鄉

西竺寺在新安鄉

西來寺在新安鄉

興隆寺在新安鄉妙嶺

定慧禪院在新興鄉剏於梁天監二年重新於明永樂二

年崇禎初僧宗妙增修爲叢林

巖頭禪院在新興鄉唐建宋景定間僧景福重建元末燬於兵

國朝順治十一年釋知春重興寺環大山中有金鵝洞鐘鼓

岑寒潭瀑雪諸勝

金相寺在新興鄉小城舊名金容宋治平中賜今額

徐燦詩幾

年行脚棲山寺一味真情似野僧日用坐眠皆事業春來花鳥亦時朋新醅白酒呼隣飲舊識青山任興登祇此平生多錯悞欲敲石磬問南能

成覺院在新興鄉舊名桃源明崇禎初僧宗妙叔建遂爲叢林後廢僧蘊舟捐貲重建

寶蓮院在新興鄉越王山顛宋嘉定間建西江安撫使真

德秀立今名富溪劉氏建宋進士胡晉侯記

國朝乾隆癸未庚子嘉慶辛未道光壬午劉氏重建

胡晉侯越王山

寶蓮院重興記記禮者曰山林川谷邱陵能出雲爲風雨者神也乾坤清淑之氣扶輿磅礴結而爲山阜融而爲川瀆必有神異主宰其間故有祀典之所崇釋老之所宅水旱疾疫於是乎禱焉此越王山爲新吳之鎮里父老相傳有無量神通是以使人信嚮者其是之謂歟嘗考豫章職方及新吳舊志皆有名見於裴弼傳奇是矣然誤以傳奇之越爲藥反指越山之稱爲藥語傳聲訛遂以藥王名之而使此山失實孔子曰名不正則言不順故不容不辨而正之予按宋元祐間洪玉父題越王山詩云越王昔何時稅駕宅此山舊志固載之矣玉父豈無所據而言耶至乾道中縣令陳寅記真常觀道士鄒文岐語以爲春秋時越王伐楚屯師此山城堞尚存考史記則謂越兵橫行江淮間豈不信然今觀山顛平曠地勢遼廓真若區衛至今人呼爲越王城名其出入之途曰城門口又有點軍坪走馬

崙皆非俚俗創說是爲越王車轍馬跡之所經行也明矣此山綿亘數十里特立奇峯中始焉榛莽蒙翳蹊路險塞樵牧所不到雲氣舒卷人候爲晴雨之占真若有司其造者邑之隱士劉大盈以活人爲業喜方外交講明修煉長生法慕文吳跨仙之異披荆蠲疏窮極幽渺採山茹美若將老焉宋嘉定丁丑有僧崇可奉其教曰靈濟師療病有聲欲求卓錫安神之所搜奇抉怪似與神謀求地於劉一語而合誅茅築屋屢出靈響緇素咸集相與鳩工施畚鍤得佛像高可五六寸許非金非石光澤堅潤背鐫歲月莫可名由是士庶懇祈無遠弗屆神道設教是何祥耶前參相西山真公帥洪日歲大旱苗欲槁士民感額相告大命近止奈何乃相率登山請禱應不旋踵遂爲有年民免於葦葦詣帥府以感應神速乞褒表之且曰寺無勅額曷永其傳願移寶蓮舊額以名此山公俞其請噫佛已廢於彼而與於此凡所知聞莫不歡喜讚嘆可乃又請曰山半舊有寺額曰金容名在瓦礫無一粥之費願結庵其址爲往來息肩之地人得其便趨者謹然可之用心悉力爲開創計勞矣規模未就一旦登堂示偈趺坐而逝紹明祖浩相繼葺理食指日夥持鉢孔艱四傳而堅師人天協順似有宿因課無積有植產安衆鐘魚動地得以不匱一方香火

之感通乎四界矣歲在丁酉堅入涅已十年不戒於火諸相皆空豈天下事當以滿盈爲忌耶抑魔能害道不可逃者數耶其明年前往持法昌不忍坐視領衆往山頽與經理其徒道成克迎厥志竭衣孟求檀施首建大殿一區暨立法輪寶藏飾以黃金丹碧諸天菩薩地行空飛相好之妙輝煌煥發且哀同衣收四大部經永實其中鑿刻四大天龍爲之環衛首聚爪奮真如背負出海者捏朔佛像神聖百種莊嚴色身具足修創僧寮廩庖福靡不完具經始於戊戌之春落成於是歲之夏又二年成躬領院事增創法堂其爲間也五爲廈也一以爲寅奉開山祖師之地而神賴以妥如是功德不可思議歲在丁未續創一閣於中鑿刻千手千眼觀音菩薩及天王龍女婆羅門等而爲之侍從及造東西殿天宮龕帳而且生平節身縮口置到新安鄉田地歲收百餘斛及山地之利永捨充於寶殿長命燈炬燈燈相續殆與此山相爲無窮可謂明遠也矣昌廣其前規創造三門及東西廊廡開山祖師龕帳幻出天官之境規模壯麗於前有光非山君川后精神貫通呼吸變化於寂感之際能如是歟夫元奘之松回指生公之石點頭有人焉疑者無盡諉山川之盛可也地有興廢道有晦明開基於先重興於後非偶然之故大書特書不一書

宜矣寶蓮舊無石志昔地主劉公子之外大父也嘗亂尚  
即叔始之概予今入裘有八咸以予齒宿辭核可信於後  
請爲之記予不得辭云

證果院在新興鄉

畊香院在新興鄉順治十三年僧敏卜基始創

鹿野寺在新興鄉明崇禎間建

國初僧逸如復構地開創

樓雲庵在新興鄉

碧蓮寺在新興鄉故縣

文殊院在新興鄉

芥納寺在新興鄉張坊

山口院在法城鄉車坪之東

普濟院在法城鄉田南

崇果院在法城鄉朱咸平間建

國朝乾隆五年僧大方重建觀音閣十四年復建大雄殿

躍龍庵在法城鄉水口

寶文庵在法城鄉嘉慶五年南岡涂以文裔重修

曇智院在法城鄉

安福院在法城鄉

延恩院在法城鄉東琴山明景泰四年寺僧忻竺天昭明

憲因舊址復建今廢

仙聚庵在法城鄉渣村起鳳山上有仙棗二株東實西花故名

白雲寺在法城鄉

祖師殿在法城鄉烏龍山

普化院在進城鄉小雄山舊名長嶺唐大智禪師初駐錫之地明天順二年僧慶雲圓勉陰圓谷等鼎勦崇禎十七年僧普雨重建後燬

國朝康熙二十一年僧大因文石重創

漱蓮庵在進城鄉陰村

白水寺在進城鄉

普通庵在進城鄉元泰定時建明正統間僧覺巽復創

皇佛院在進城鄉

大覺院在進城鄉羅坊明洪武間僧志滿創分寧黃山谷有清林高逸題額佛座後一石洞每遇天氣晴爽有嵐氣湧出雲亘數十丈士人以爲科名先兆

闡化院在進城鄉嘉靖初創今廢

大善堂在進城鄉羅坊

安瀾寺在進城鄉竹埠

潔庵在進城鄉竹埠

三元殿在進城鄉竹埠

北台寺在進城鄉羅坊

羅源庵在進城鄉巴源

嘉慶十年移建竹溪

主山寺在進城鄉羅坊

芝山庵在進城鄉藍田羅光孚捐建

慈雲寺在進城鄉冶城彭瑞麟母涂氏捐建

紫雲庵在進城鄉藍田羅興楫建

普安院在奉化鄉唐乾符中勣元季燬明洪武五年僧智

義建陰幼遇鄧梓有記

國朝康熙初重建

九仙壽聖禪院在奉化鄉九仙山唐時有僧梵雲駐錫於

此賜號大厯禪院宋治平三年賜今額紹聖初增修潘興  
嗣記今廢

崇因院在奉化鄉寶岳山明正統間普化院僧汪圓勉建  
戒德院在奉化鄉密巖山舊名紫雲寺明景泰四年普化  
院僧圓勉覺瑛覺証全建後廢萬厯三十二年里人彭祥  
仲修

國朝乾隆二十四年同知蔡鴻才勣建後殿

迴瀾寺在奉化鄉橫石橋舊名千佛院

福勝院在奉化鄉舊名芳瑩

龍巖寺在奉化鄉小桃源職員劉應謙建

廣福院在奉化鄉橫石橋

曇慧院在奉化鄉舊傳劉道成修煉之所

寒溪院在奉化鄉甘坊唐大智禪師往來之所久廢明洪

武初僧幻無有重修宣德間僧祖慶增葺

金湖院在奉化鄉富溪

白雲庵在奉化鄉嶸嶂山劉道成成仙之地

曼殊寶雲寺中白雲庵詩

草庵何似清風橫更在空中最上頭眼界豁開無畛域枯藤古木暮烟浮 宋應昇白雲庵詩朝來結襪白雲峯蘭若巖旣寄遠棕濟勝已同元度具買山况負道林蹤千巖積雪寒金粟百尺懸泉隱梵鐘乘興不禁遐討思翻疑鉢裏有真龍

水竹庵在奉化鄉石溪蔡學圃捐建

崇覺院在奉化鄉今廢

喬慶寺在奉化鄉甘坊

文瀾寺在奉化鄉甘坊

涵碧寺在奉化鄉石溪

吉祥寺在奉化鄉橫石橋

古基寺在奉化鄉古基山

獨孤庵在奉化鄉桃源

雲峯寺在奉化鄉雲峯山

善法寺在奉化鄉小溪封員蔡東山捐建

龍沙庵在奉化鄉富溪水口

三峯寺在奉化鄉蔡貽孫重修

清遠寺在奉化鄉小溪蔡貽孫建

海慧院舊載唐乾符中建未詳所在

昭德觀在縣治西二百步舊名闔業劉道成故宅也梁大

同中始建觀祀之唐末燬於兵道士徐守正興復南唐時

胡仲堯重修李主賜詔褒美徐鉉作碑記宋祥符元年賜

今額明洪武初道士李心易章志德相繼繕修成化間彭

昱王秉章重建

國朝乾隆丁丑上富劉氏重修正宇併門首牌坊嘉慶庚申

劉氏復修觀傍東隙地捐助文昌閣及考棚觀傍西屋宇

歷為胡氏裔修葺徐成業捐建二門一重戲臺一所

徐鉉昭德

觀碑記據奉新縣志西晉邑人劉真君故居也真君名道成以經明行修仕至刺史營心仙術淡志名途故真君辭張柄之祿追茅許之風單車還鄉勤行不息以永嘉二年八月十五日舉族上昇謁爾福鄉依然舊址錦帷下降玉鳥長留梁大同中乃建為觀獅山坐蔭洪井儲靈華林蒼翠當其陽馮水清冷環其域烟霞輻映竹樹青蔥居然人境之間自是仙遊之地載祀四百朝市三移封域之間英靈不泯土德既微羣方遭難城有復墮之患室多燒棟之因乃眷殊庭俄悲閭戶有道門都監徐守徵者翦除宿弊以創精廬入室弟子龔紹元吳紹甄皆能肅恭真科祇稟遺訓高士胡君仲堯以為集靈之館祈禱之場陋而不度民將安仰於是舉時興役即舊謀新凡殿堂門闕居室廚廩延袤周徧始且百區三尊衆真羽儀侍衛精靈肅穆不可為狀日吉辰良明祀以告成功精意以答真祐如是可耳其銘曰大道無名得之者真矯矯劉君知幾其神建爾矣社上為帝君維梓之地甘棠之人峙此仙祠章江之濱華表未歸桑田已故舊井雖堞高臺尚在不見芝英猶芬



蘭莖佳氣鬱葱如將有待彼美胡君州間之英世味道映  
 家傳義聲歸誠玉闕奉贊金籙易此頽宇化為殊庭乃眷  
 福鄉實為南楚閉觀相望鑿輪交午具圖秘籙惟仁是與  
 刻頌貞珉承規終古幸元龍昭德觀道藏記新吳縣之  
 闕闡有百晉劉真人道成煉丹所永嘉二年丹成天隱梁  
 大同元年其地為闕業觀皇朝大中祥符元年改元賜今  
 額及建炎紹興香火不續逮冲貞大師熊元澤來主觀事  
 支傾庇福觀宇復整乃圖建道藏鳩工弗竟唐若仲陳端  
 一承之嘉定十有一年藏成雄偉暈翠寶輪飛動鏤華飾  
 金晃於他所屬記於余夫日昃而晝月昃而夕天地之輪  
 也春徂而暑秋徂而寒四時之輪也精氣為物遊魂為變  
 死生之輪也斗北而虛斗南而盈萬物之輪也大道寓於  
 一輪士民觀聽醒然有覺知二氣周流洪鈞不息一元轉  
 運其機不停推去諸惡挽回萬善尸居而龍見淵默而雷  
 聲神動而天隨超出乎醒生夢死而融天地四時萬物為  
 一神與無方易與無體則輪乎輪乎枯木云乎哉一動一  
 靜五為其根陽變陰合而金木水火土生焉生生不窮循  
 環無始則太極之妙同此一機關也同此一樞軸也世界  
 可藏於一粟山川可煮於一鑪是藏之立乾不可以旋乎  
 坤不可以轉乎形而下者氣也形而上者道也藏也者其

形而下者乎端一赤城人也慕丹霞傲司馬子微之遺風  
 形而上者其朗徹焉以須真覺按此陳端一與政和中  
 賜號之陳端一當係兩人白玉蟾詩我見仙郎不足跨  
 面顏玉鍊燦丹霞新開天上圖書府舊是雲中雞犬家三  
 十六年心似鐵百年萬事眼前花如今漸覺逢迎懶一日  
 兩番蜂報衙劉應棠謁先真人詩二火自顛危氏老焯  
 將塌爰偕司馬昆南奔幾先見驅車至新吳俯仰形勝遍  
 遂隱馮水西河流感梁汴一朝去簪笏拜辭司馬公兄其  
 傳世速我將拍洪崖把浮邱學道於崑崙與崆峒丹成功  
 德最上帝籍仙卿長嘯別親串冲舉朝玉京至今騰雲巷  
 登仙橋千數百年之邑乘猶有丹砂之餘馨司馬純孝友  
 舍宅為元都大同賜闕業昭德賜祥符歷代遞興廢官觀  
 傳至今前階煉丹井後園豫章林天上圖書府雲中鼓鐘  
 深玉蟾留墨妙蘓髯酌泉新黃冠轟霹靂丹詔下楓宸於  
 哉穆清廟接武蹕雲初夫何祝令懷劍去丹井塞如闕幡  
 幡司馬裔恭謁心悽愴風雨飄搖甚孤立危靈光吁嗟先  
 真神陟降大同祥符應再揚重興此真嶠闕苑佑官家世  
 世君王

斗姥閣舊在昭德觀進城鄉彭溶母羅氏彭浩母熊氏彭

濤母何氏合建嘉慶年間邑創文昌宮移建觀後

朝天宮在縣治東北從東白源徙此舊名崇元觀明洪武  
初道士胡珉鼎剋徐復高新之嘉靖三年改建於東門外  
國朝順治九年邑衆修復易今名另建觀音堂於左元帝殿  
於右

七靖元宮在寶雲寺右卽崇元觀故址明萬厯間邑人宋  
應星倡建祀許旌陽

國朝康熙二十三年道士李靜隱募建玉皇閣於後乾隆十  
四年道士洪常德建斗姥閣前重制極宏敞

各鄉萬壽宮附 一在進城鄉羅坊鎮一在奉新鄉龍規一在法城

鄉南溪一在奉新鄉候龍渡旁有斬蛟石一在奉化鄉甘  
坊一在南鄉名真君廟

九天閣在游魚石宜知縣黃虞再建後傾圮乾隆五十七

年重建

李飛鵬九天閣詩新成高閣砥中流浪湧濤迴致  
自幽千載空明邀月入四時縹緲喜雲留閉閣層

疊山容麗笑看紛紜人跡稠一片心情誰與共翩翩逸興  
寄滄洲蓬萊仙境出人寰天女高歸霄漢間一水灤涸澄  
碧色萬峯環繞萬蒼顏花開春暖江鷗集木落秋深鷗塞  
還地勝神靈多雨澤不須豪句破天慳 縣市州

同廖廉捐送山園屋地共計十二處一紫港尾屋場前後

基地園地苗竹雜樹山一屋左雜樹竹山一屋後雜樹苗

竹山一屋後併左側松竹雜樹山一張姓屋後雜樹山一

閔姓屋側雜樹菜地一泉井邊苗竹樹山一獨園里竹木

雜樹山一獨園隔壁杉木雜樹山一閔姓屋右側雜樹山  
又連片雜樹山一仝趙姓屋一所靠西逢龍口前後屋一  
半又縣市州同胡鵬捐送建康鄉洲子上田租五石州同  
張錫海捐送顯教寺前田租五石進城鄉封職彭獻琨捐  
送田租三石嘉慶二年生員令光奎捐送南鄉烏桶里田租  
二石五斗以爲經費  
葆真觀在從善鄉舊名尹仙觀相傳尹仙煉丹於此宋六  
觀元年賜今額

景雲觀在建康鄉舊名拔茅觀宋治平中賜今額明洪武  
間道會章志德重修

曼壽觀在建康鄉舊名延平觀相傳吳彩鸞陶安公俱經

此治平中賜今額

浮雲宮在同安鄉浮雲山有浮邱石室李八百洞唐開元  
二十五年孫真人智諒請觀額賜曰浮雲宋熙寧元年增  
壽聖二字宮前有劍池丹井舊有三堂俱燬於元季明洪  
武元年道士陳雲隱創復爲正一叢林何孟津建殿置田  
宣德間以觀穀賑饑民九百石今廢

唐宣宗詩道人西蜀  
來自謂八百歲愛此

華林幽穴居聊避世真風度萬劫神仙邈相繼靈岫摩天  
空鳥道入雲際石罅紫苔封泉初墨龍憩碧桃花未開白  
鹿跡已逝春風撼山館急雪舞林際滌除衣上塵刮盡眼  
中翳何當贈刀圭豈復便俗吏吾不學李寬盜名取嘲戲  
袁陟詩爲余傳語嶺頭雲知汝無心笑我勤我亦誓來  
稱使者眼看官職似看君楊萬里詩李真宅子故依然  
道院西偏古洞前一日身遊八百里三番花落九千年丹  
臺石室俱蒼薛絳節霓旌已碧天借問地行安用步步行

猶是地行仙 朱雲鳳詩俗吏紛拏樂事慳公餘投問強  
登山雲浮日色來宮上石澗泉聲在樹間笑口暫開塵世  
曠浮生謾竊歲時閒况逢賓從都名俊浪飲何妨一醉還  
余緱蘭詩山引遊人思閒攜竹杖迴風飄日色淡水發  
石聲哀古洞雲全鎖顏宮薛半開舊時花木謝別鶴去還  
來 李時應詩雲到此閒定不浮仙人去住幾千秋猶龍  
祖世將無並請以元元家系求 涂日章小憩浮雲引鶴  
松下詩鶴以何年去松猶蔭圮橋班留秦代篆蓋偃漢時  
條有履吾應納無書空再求素函全不驗黃石亦偏愁

真福觀在同安鄉元秀峰東南唐開元中建觀西有天師  
塔相傳孫天師尸解處

希夷觀在同安鄉舊名毛仙觀相傳旌陽與毛仙談道於  
此宋治平中賜額元季燬

丹成觀在同安鄉道士李梅山叔

永福觀在同安鄉舊名龍仙觀宋治平中賜今額

嘉福觀在奉新鄉舊來仙觀宋治平中賜今額

延真觀在奉新鄉觀側有鎮蛟石相傳吳許二真人逐蛟  
入穴以巨石書符鎮之 于奕正天下金石志奉新有唐鎮  
蛟石碣宋延真觀鐵柱銘胡世將

真靜觀在奉新鄉唐孫智諒得道於此開元中賜今額

立雲觀在陶仙山舊名陶仙觀即陶安公故宅也宋治平

三年賜今額明洪武三年里人潘亦清修 余緱蘭詩孤峯  
大石尚巍然世

遠難窮煉藥年鐵冶曾傳青鳥信林邱那復赤龍騰元符  
縹緲雲霞外帝象微茫斂鼎前嘉爾胸中多逸興同來巖  
下看洪泉

景福觀在南鄉陶安公二女冲舉之地舊名會仙觀宋治平中賜今額明洪武五年道士熊持用重葺成化十八年里人胡憲重修

國朝乾隆辛丑僧達空重修嘉慶庚午僧源湖廣惺重修元道觀在南鄉石湖舊名龍泉觀宋治平中賜今額

崇虛觀在南鄉舊名崇靈卽東白源道書第三十六福地劉道成飛昇處也宋政和中賜額

按東白源黃志云在太史廟之北

紫陽靖在南鄉羅塘大澤村斂井旁卽許仙真君所葺七靖之一今改爲真君殿又萬壽寺在劍井左旁祀許真君招仙觀在南鄉泗源宋熙寧中賜今額

柏林觀在北鄉許真人獲劍於此割地出泉以療疾宋熙寧中賜額明洪武間道會李心易復建成化間邑人胡正德改卜其地尋廢

國朝乾隆五年邑舉人魏士宗尋舊址湮井出焉倡募重建大元觀在新安鄉舊名崇真觀相傳許旌陽葉元師煉丹於此宋熙寧二年賜今額後王同至重修

青霞觀在新安鄉相傳赤松子傳道處宋治平中賜今額啟真觀在鳳皇山新安新興同祀

真常觀在新興鄉越王山舊名招仙觀卽文簫吳彩鸞跨虎之地宋治平中賜今額明洪武元年道士彭秋遠修

國朝康熙九年道士張含貞重修正殿

元真觀在新興鄉蘆茨山許旌陽逐蛟之所元泰定間道

士胡明德建明洪武初道士王惟善修

鄧梓記自世傳許旌陽伐蛟於洪而

洪之封內往往指其遺跡以為祠觀之設其大者為玉隆萬壽宮次專總奇勝崇構宏敞者不可悉數新吳邑郊之上二十里為蘆茨山山之下溪水黥然大魚潛處其中若有神物呵衛者然人曰旌陽嘗歷是山折蘆為矛剪茨為鐵以禦蛟於此而山以是得名昔祠焉而廢今其址可按而索也泰定甲子冬延真觀道士胡明德與其徒往觀焉顧視林木泉石真仙人居明德曰旌陽以大澤施於洪洪之人戴之祝之靡不茂矣而此獨廢何居吾聞里有諸君德澄稱樂施長者可義動之於是德澄喜曰沂有志久矣弗果為今又得君主之可立具也乃相與度其舊址而經營之既來請名於教所榜曰元真割田園以養其眾已而嘆曰人以起廢屬我而我以鹵莽成之庸可視久遠耶復搜羣材鳩眾工榘栳豫章以斧以鉞殿堂門廡廩廚以次而庀黝堊丹漆剖劇雕鏤百手皆作崇其像設備其器用

說數歲乃成大抵規制崇雅金碧駭觀使人見之如登蓬萊如入化城良可樂也於是明德悉其始末請余記之余謂旌陽以忠孝得仙而有德於洪之人大矣千載之下苟能一祠營一宮假旌陽以號於人不旋踵集事矧茲山之靈蹟可徵而故祠之遺址猶在則其興之也固宜然不有明德以啟其機德澄之樂於施其興固無繇也或曰昔旌陽師謀母以得道今謀君復崇祠宇以祀旌陽謀氏之有功旌陽哉旌陽有知其福謀氏也審矣又安知明德非八百仙之一人本為謀氏來耶噫是固不可知也姑為記其梗概使來者有以考焉明德族出華林有儒者氣象歲所授以文逸元同法師之號云

玉虛觀在法城鄉舊名靈仙觀旌陽逐蛟之所梁永聖間

建宋治平中賜今額明洪武七年道士魏自成道珍修

仙遊觀在進城鄉舊名龍泉觀旌陽逐蛟至此宋治平中

賜今額後廢重修周貫謝良齋俱有記復燬明洪武七年

道士朱獨立重剏

劉應棠詩北坐峰環衛長溪影鬱林鳥行丹竈靜松蓋羽衣深澹漠恬消長空

明轉照臨落星何處覓鐘恍五更心

按舊志有星落於新吳之野里人移奉仙遊觀

崇真觀在進城鄉羅坊鎮明洪武元年道士彭元春剏

劉真君觀在奉化鄉上富水口

附

夢海菴在縣治西北隅尼菴舊志不載而縣治圖有之今

據以補入道光三年職員陳世瑜母涂氏捐奉新鄉田租

七石為養贍之費